


特別
^ 18
3414
18






門 18
號 3414
卷 18

御訂全

金詩增補中州集卷六十四



金元好問原本



元好問二

秋蠶

室人筐中無寸縷。一箔秋蠶課諸女。朝來飼却上馬桑。隔簇仍聞竹間雨。阿容阿璋墨滿面。畫徹灰。

早稻田大學
昭和25.6.22
購 來

全金詩卷六十四
城前致語上無蒼蠅下無鼠作繭直須如甕許東
家追胥守機杼有桑有稅吾猶汝官家却少一絢
絲未到打門先自舉

南溪

南溪酒熟清而醇北溪梅花發興新前年去年花
下醉今年冷落花應嗔梅花娟娟如靜女寂寞甘
與荒山鄰詩人愛花山亦好幽林穹谷生陽春風
鬟峨峨一尺雲芳香幽臥如相親山堂夜半北風

惡一點相思愁殺人

范寬秦川圖

張伯玉歿後同
麻徵君知幾賦

亂山如馬爭欲前細路起伏蛇蜿蜒秦川之圖范
寬筆來從米家書畫船變化開闔天機全濃淡覆
露清而妍雲興霞蔚幾千里著我如在峩眉巔西
山盤盤天與連九點盡得齊州烟浮雲未清白日
晚矯首四顧心茫然全秦天地一大物雷雨瀕洞
龍頭軒因山分勢合水力眼底廓廓無齊燕我知

寬也不辦此渠寧有筆如修椽紫髯落落西溪君
長劍倚天冠切雲望之見之不可親元龍未除湖
海氣李白豈是蓬蒿人愛君恨不識君早乃今得
子胸中秦作詩一笑君應聞予七年前過郾城伯
玉知予來而都無賓
主意予亦偃蹇而去爾後雖願交而髯沒矣未嘗
不以爲恨也今日子思兄弟出此圖求予賦詩酒
惡無聊中勉爲賦此畫本米元章家物有韓子蒼
題名元章以爲中立而元暉以爲中正以予觀之
此特張髯胸中物耳知
者當不以吾言爲過云

寄答溪南詩老辛愿敬之

五年不喚溪南渡日夕心馳洛西路山中今日見
君詩惆悵良辰又相誤龍蛇大澤變風景虎豹天
門鬱烟霧丈夫不合把鉏犁青鬢無情忽衰素平
泉漫作窮愁志笠澤休題自憐賦陸龜蒙有
自憐賦長安
正有五侯鯖骯髒誰能作樓護青燈老屋深蓬蒿
蝙蝠掠面莎雞號劍歌夜半激悲壯松風萬壑翻
雲濤區區墓上曹征西我知慚媿王東皋人生只
有一杯酒螟蛉螺贏安能豪

西園

興定庚辰
八月中作

西園老樹搖清秋
畫船載酒芳華游
登山臨水祛煩憂
物色無端生莫愁
百年此地旃車發
易水迢迢鴈行沒
梁門回望繡成堆

時金主遷
都于汴

滿面黃沙

哭燕月熒熒一炬殊可憐

蒙古破金燕都焚
宮室火一月不滅

膏血

再變為灰烟富貴已經春
夢後典刑猶在

一作
靖

康前當時三山初奏功
三山宮闕雲錦重
璧月瓊枝春色裏
畫闌桂樹雨聲中
秋山秋水今猶昔
漠

漠荒烟送斜日
銅人攜出露槃來
人生

一作
豈無情

淚沾臆麗川亭上看年芳
更為清歌盡此觴
千古是非同一笑
不須作賦擬阿房

雙峯競秀圖為參政楊侍郎賦

紅烟霏霏雲拂石
山木蕭蕭山鬼泣
江岸人家失南北
兩峯突兀何許來
元氣淋漓洗秋碧
畫家晴景費經營
共愛移山入杳冥
安得北風吹雨去
倚天長劍看崢嶸

二月十五日鶴

九龍岡上玄元祠人言尊像神所遺年年二月降
靈鶴來無定數有定期城頭曉露生新警萬首望
穿雲際影不知濁世誰下臨只許霜毛見修整石
壇花落松風冷戛然長鳴人語定百年黧老誇見
聞萬里黃冠赴靈應只從游騎突重圍城郭并與
人民非可憐侈殿荒烟一作墟裏無復當年丁令威

閻商卿還山中

阿卿去月從我來今日西山成獨往野人不是城
中物澗飲巖棲夢餘想翰林溼薪爆竹聲待詔履
穿沾雪行蘭臺從事更閒冷文書如山白髮生孤
燈靜照寒窗宿北風夜半歌黃鵠田家閉門風雪
深梅花開時酒應熟半世虛名不療貧棲遲零落
百酸辛憑君莫向山中說白石清泉笑殺人

鄧州城樓

鄧州城下湍音專水流鄧州城隅多古丘隆中布衣

不復見浮雲西北空悠悠長鯨駕空海波立老鶴
叫月蒼烟愁自古江山感遊子今人誰解賦登樓

宛丘歎

秦陽陂頭人迹絕荻花茫茫白於一作如雪當年萬

家河朔來盡出牛頭入租帖蒼髯長官錯料事下
考大笑陽城拙至今三老背腫青死爲逋懸出膏
血君不見劉君宰葉海內稱饑摩寒撫哀孤惇碑
前千人萬人泣父老夢見如平生冰霜紈袴渠有

策如我碌碌當何成荒田滿眼人得耕詔書已復

三年征早晚林間見雞犬一犁春雨麥青青

髯李令南

陽配流民以牛頭租迫而逃者萬餘家劉雲卿御史宰葉除逃戶稅三萬斛百姓爲之立碑頌德賢不肖用心相遠如此李之後十年予爲此縣大爲逋懸所困辛卯七月農司檄予按秦陽陂田感而賦詩李與劉皆家宛丘故以宛丘歎命篇

遊黃華山

黃華水簾天下絕我初聞之雪溪翁丹霞翠壁高
歡宮銀河下濯青芙蓉昨朝一遊亦偶爾更一作又

覺摹寫難爲功是時氣節已三月山木赤立無春
容湍聲洶洶轉絕壑雪氣凜凜隨陰風懸流千丈
忽當眼芥蒂一洗平生胸雷公怒擊散飛雹日脚
倒射垂長虹驪珠百斛供一瀉海藏翻倒愁龍公
輕明圓轉不相礙變見融結誰爲雄歸來心魄爲
動蕩曉夢月落春山空手中仙人九節杖每恨勝
景不得窮攜壺重來巖下宿道人已約山櫻紅

密公寶章小集

天東長白大寶幢天河發源導三江有木蔽映山
朝陽云誰巢者雛鳳凰雲間吐氣日五色百鳥不
敢言文章名都盤盤魏大梁黃金甲第羅康莊王
家書絕畫亦絕欲與中秘論低昂密公書院無絲
簧窗明几潔凝幽香元光以後門鑰廢文士稍得
連壺觴客來喜色浮清揚典衣置酒餘空箱生平
俊氣不易降眼中俗物都茫茫淵明素琴嵇阮酒
妙意所寄誰能量在昔武元握乾綱扶桑爲弓射

八荒獵取

一作雨

大國如驅羊民風朴魯資鷲疆文

洽未及武尅剛興陵之孫越王子天以人瑞歸明

昌十三執經侍帝傍十八健筆凌阿房撐腸文字

五千卷靈臺架構森鋪張高陽苗裔襲衆芳胡不

置之貢玉堂袖中正有活國手地下纔得修文郎

悲風蕭蕭吹白楊丘山零落可憐傷承平故態耿

猶在拂拭寶墨生輝光恰似如菴連榻坐一甌春

露澹相忘

明昌寶玩羣玉中秘內府圖書印也越邸有柳公權紫絲鞵歐率更海上楊凝

式乞花等帖然獨推元章華佗為古今絕筆宋畫譜山水以李成為第一國朝張太師浩然王內翰子端奉旨品第書畫謂成筆意繁碎有畫史氣象次之荆關范許之下密公識賞超詣亦以此論為公郭乾暉崔棘公以為當在太古無上唐以來諸人筆虛筆實皆非其比故予詩及之樗軒公自號也又所居有如菴詩集號如菴小藁越王諸子惟樗軒貧甚典衣沽酒之句蓋實錄云甲午三月二十有一日為輔之書于聊城至覺寺之寓居

荆棘中杏花

牆東荒蹊抱邨斜荆棘狼籍盤根芽何年丹杏此
留種小紅濺濺爭春華野人慣見謾不省獨有詩

客來咨嗟天真不到鉛粉筆富豔自是宮闈花曲
池芳徑非宿昔蒼苔濁酒同天涯京師惜花如惜
玉曉擔賣徹東西家杏花看紅不看白十日忙殺
遊春車誰家園亭有此樹鄭重已著重幃遮阿嬌
新寵貯金屋明妃遠嫁愁清笳落花縈簾拂牀席
亦有飄泊沾泥沙天公無心物自物得意未用相
陵誇黃昏人歸花不語惟有落月嘯栖鴉

送張君美往南中

南朝詞臣北朝客棲遲零落無顏色陽平城邊握
君手不似銅駝洛陽陌去年春風吹鴈迴今年鴈
逐秋風來春風秋風鴈聲裏行人日莫心悠哉長
江大浪金山下吳兒舟船疾於馬西湖十月賞風
煙想得新詩更瀟灑

贈休糧張鍊師

金砂霧散風雨疾一點黃金鑄秋橘中林宴坐人
不知野鹿銜花蜂課蜜富兒盤饌羅羶葷擾擾飛

蠅復聚蚊見說西山好薇蕨一枝青竹願隨君

讀書山雪中

前年望歸歸不得去年中途脚無力殘生何意有
今年突兀家山墮眼前東家西家百壺酒主人捧
觴客長壽先生醉袖挽春迴萬落千邨滿花柳山
靈為渠也放顛世界幻入兜羅綿似嫌衣錦太寒
乞別作玉屑糝山川人言少微照鄉井準備黃雲
三萬頃何人辦作陳瑩中來與先生共炊餅

陳先生貶

官後荅京師人書云南州有何事今年好雪明年炊餅大耳

過晉陽故城書事

惠遠祠前晉溪水翠葉銀花清見底水上西山如
臥屏鬱鬱蒼蒼三百里中原北門形勢雄想見城
闕雲烟中望川亭上閱今古但有麥浪搖春風君
不見繫舟山頭龍角禿白塔一摧城覆沒薛王出
降民不降屋瓦亂飛如箭鏃汾流決入大夏門府
治移著唐明邨只從巨屏失光彩河洛幾度風烟

金言卷六十四
昏東闕蒼龍西玉虎金雀觚稜上雲雨不論民居
與官府仙佛所廬餘百所鬼役天財千萬古爭教
一炬成焦土至今父老哭向天死恨河南往來苦
南人鬼巫好禳祥萬夫畚鍤開連岡官街十字改
丁字釘去聲破并州渠亦亡幾時却到承平了重看
官家築晉陽

蟾池

老蟆食月飽復吐天公一目頻年瞽下界新增養

蟾戶玉斧誰憐修月苦郡國蟾池知幾所碧玉清
流水仙府小蟾徐行腹如鼓大蟾張頤怒於虎渠
家眉間有黃乳膏梁大丁正須汝何人敢與月復
讐疾過池頭不容語向來屬私今屬官從今見蟆
當好看爬沙卽上青雲端

高門關

高門關頭霜樹老細路千山萬山繞亂餘邨落不
見人雪霰霏霏暗清曉莘川百里如掌平閒田滿

眼人得耕山中樹藝亦不惡誰遣多田知姓名許

李申楊竟何得只今惟有石灘聲

許致忠楊湯臣申伯勝李仲常

名宦四家隱盧氏時以多田推之亂後俱不知所在矣

甲辰秋洛陽得黃葵子種之南菴明年夏六

月作花佛經所謂閻浮檀金明淨柔軟令人

愛樂者此花可以當之因為賦長韻予方以

病止酒故卒章及之

芳蕤浥露嬌黃濕五疊湘裙輕襞積晨妝午醉一

日間白白紅紅總狼籍上陽宮女要頭冠摹寫雖
工破的難看來明淨復柔軟花中乃有閻浮檀千
里移根洛陽陌主人不飲誰看客乞與金杯自傾
側明年為渠當舉白

雲峽 并序

君璋啓事西涼占對稱旨其還也行臺公以
宣和寶石為貺奇秀溫潤信天壤間之尤物
君璋目之曰雲峽邀詞客賦詩予亦同作

石盆清冷貯秋水水面蒼烟飛不起一堆寒碧几
研閒寶氣崢嶸插箕尾山中雪浪空影像長安鸚
鵡猶紈綺枉著奇章甲乙中槁項纔堪把耕耒不
知天壤此尤物鬼刻神劖通有幾薰蒸似欲出泉
脈瑩滑定應凝石髓剝裂雯華漬月秋辛苦詩仙
費摹擬車箱箭筈連西東仇池百穴總玲瓏飛墮
不嫌靈鷲小奇探已覺太湖空故都喬木今如此
夢想熙春百花裏膏血綱船枯九州亡國愁顏爲

誰洗主人天質粹以溫天然與山作知聞退食從
容北窗臥今古起滅真浮雲

雲巖 并序

觀州倅武伯英崞縣人少日舉進士有詩名
其賦翦燭刀有曉殘瘦玉蘭心吐蹴落春紅
燕尾香之句甚爲時輩所稱家故饒財第宅
園亭爲河東之冠貯書有萬卷樓嘉花珍果
悉自他州移植爲人多伎巧山水雜畫斲琴

和墨皆極其工嘗得宣和湖石一窾窾穿漏
殆若神劖鬼鑿炷香其下則烟氣四起散布
槃水上濃淡霏拂有烟江疊嶂之韻吾鄉衣
冠家法書名畫及藏書之多亦有伯英相上
下者伯英獨特寶石以擅奇汾晉閒耳與定
末伯英沒於關中楊戶部叔玉購石得之壬
辰圍城中以示予且命作詩危急存亡之際
不暇及也乙巳冬十一月來東平過聖與張

君之新軒而此石在焉聖與名之曰雲巖予
問石所從來聖與言夏津王帥得之汴梁泥
塗中而以見貽予因歎一物之微經歷世變
遷徙南北乃復爲好事者之所寶玩似不偶
然乃爲詩道其故聖與三世相家以文章名
海內其才情風調不減前世賀東山晏叔原
故卒章以蕭閒明秀峯故事屬之

壺中九華玉孱顏紫烟著水往復還小窗虛明淡

全金言卷六十四
古
相對不數漢宮銅博山會稽禹穴深無底寶石偷
來定山鬼一堆寒碧殊不凡滿谷春雲更堪喜阿
欣秀發見眉宇小杜才情淪骨髓摩挲不作几上
看繚白紵青便千里渾沌日鑿餘空嵌漏天蒸濕
饒風嵐世外元無種香國海南真有補陀巖觀州
愛玩頻湔祓民部平生幾熏沐藏舟夜壑未厭深
竟作新軒坐中物一天星斗入金樽翠射娉婷自
有人只欠宣和鄭先覺爲君留寫五湖真

天涯山

九州上游推大鹵獨恨山形頗椎魯天涯一峯今
日看快似昂頭出環堵何年氣母此融結鬼鑿神
劖未奇古八窗玲瓏透朝日洞穴慘澹藏雷雨名
花錦石粲可喜乞與雲烟相媚嫵半空擲下金芙
蕖想得飛來自玄圃傳聞絕頂更靈異云是清都
羣玉府五雲飛步吾未能風袂泠泠已輕舉東州
死愛華不注向在陋邦何足數敬亭不著謝宣城

斷岸何緣比天姥酒船何時朝復莫倒卷滹沱浣
塵土喚起山靈搥石鼓漢女湘妃出歌舞詩狂他
日笑遺山飯顆不妨嘲杜甫

山有石
鼓神祠

王右丞雪霽捕魚圖

江雲滉滉陰晴半沙雪離離點江岸畫中不信有
天機細向樹林枯處看漁浦移家媿未能扁舟蕭
散亦何曾白頭歲月黃塵底笑殺高人王右丞
世宗御書田不伐望月婆羅門引先得楚字

韻

瑤光樓前按歌舞桂樹秋香月三五白頭誰解記
開元四海歡聲自簫鼓兩都秋色皆喬木三月阿
房已焦土天人亦有離別情可是田郎心獨苦承
平舊物霓裳譜寶氣暉暉映千古銀橋望極竟不
歸滅沒燕鴻下平楚

贈別孫德謙

津橋垂楊雪花白挽斷春衫苦留客西河一雨春

意濃絕似銅駝洛陽陌河亭轟醉臥春風到手金
杯不放空鵲山一帶傷心碧羨殺孫郎馬首東

太原贈張彥遠

并州城邊十月末清霜稜稜風入骨因君夜話吳
江春酒光瀲灩金杯滑閒閒騎鯨去滅沒當年愛
君俊於鵲平生我亦識翁人惆悵流年如電抹官
家新築文昌臺蒼生不憂墮巔崖眼看東閣奇士
滿如君豈得藏蒿萊晨雞未鳴子當發明星煌煌

大於月野夫一笑冠纓絕

鹿泉新居二十四韻

土門西邊井陘渡野日荒荒下汀樹榆關石嶺都
幾程客夢往往迷歸路塵埃風雨半生過儘著筋
骸支世故寧州假館又兩年未保東來不西去山
城百家家有山靚面呈山誰一顧賣書買得呂氏
園不謂全山舉相副北崖老作土灰色擁腫形模
一夸父娟娟正有小峨嵋却立不容親杖屨就中

抱犢尤峭拔望見韓山卽攀附韓王砦頭四望闊
金趙米如纜數聚眼中麾蓋天上來泝水鼓旗紛
偃仆漢家威靈萬萬古石子連岡猶虎距夏秋衆
壑會鹿泉浩浩湍聲瀉餘怒西南諸峯不知數蕩
海鯤鱷尻背露霏烟空翠有無中百態陰晴變朝
莫靈巖龍泉曾一到獨欠封龍展衰步學仙不愛
徐童花李相書龕心所慕平生懷抱向山盡老氣
崔嵬如有助巖居枯寂朝市喧喧寂兩閒差有趣

得行固願留不惡流坎且當隨所遇何曾萬錢何
用許方丈有山容下筯管城初無食肉相黃帽非
供折腰具明年高築野史亭天已安排看山處多

一作

慙不及謝宣城標出敬亭天一柱

一本二句在方丈有

山容下
筯之下

王學士熊岳圖

洗參池水甜於蜜玉堂仙翁髮如漆膝前文度更
風流盡卷風流入詩筆長松手種欲摩天海岳樓

空落照邊古來說有遼東鶴仙語星星誰爲傳五
百年間異人出却將錦繡裹山川

去歲君遠遊送仲梁出山

去歲君遠遊今年客他州青天萬古一明月只與
行人人生莫愁問君遊何許情多地僻

一作

今徧處

處金鞭斷折騏驎死萬里長鴻思一舉憶初識子
梁王臺清風入座無纖埃華岳峯尖見秋隼金眸
玉爪不凡材西園日晴花滿烟五雲樓閣三山巔

玉樹瑤林照春色青錢白璧買芳年三年一夢南
陽道汴水迢迢入秋草挈雲心事人不知千首新
詩怨枯槁破屋仰見星疎衾風露清匣中有長劍
爲君鳴不平泥塗久辱思一濯去去舉足皆清泠
鄧州大帥材望雄愛客不減奇章公軍中宴酣笳
鼓競銀燭吐焰如長虹幕中多士君又往談笑已
覺南夷空東州春迴十月後梅花分香入春酒平
生得意欽與京青眼高歌望君久浙江南下青汭

全金詩卷六十四
法石門細路蒼烟屯五松平頭白日靜千山萬山
如亂雲菊源不逐時事改芝嶺自與商顏鄰他日
相思一回首漁舟時問武陵人

欽謂欽叔京卽京父也樂天書以微

之爲微

此日不足惜

此日不足惜此酒不可無頗怪昌黎公亦復爲世
儒天生至神物與人作華胥一酌舌本強二酌燥
吻濡三酌動高興四酌色敷腴連絲五六酌枯腸

潤如酥眼花耳熱後萬物寄一壺十酌未渠央百
觚亦奚拘人生一世閒忽若過隙駒有酒不解飲
問君誰與娛君不見東家騎驃李膽滿六尺軀萬
言黃石策八陣夔州圖酒酣起舞不稱意長吁青
雲指夷吾又不見西家紫髯郎老氣雄萬夫狂歌
飲燕市擊筑聲嗚嗚倚天長劍插少室頗欲四海
皆東湖鷹揚虎視今焉如河山永隔黃公壚銜杯
直待秋井塌青苔白骨憐君愚少年覓計生白鬚

捫參歷井無危途榮不滿睫良區區就令一朝便
得八州督爭似高吟大醉窮朝晡餘名安得潤枯
骨四十豈不知頭顱此日不足惜此酒不可無太
虛爲室月爲燭醉倒不用春風扶

虎害

北山虎有穴南山虎爲羣目光如電聲如雷倚蕩
起伏山之垠百人一飽不留骨敗衣墜絮徒紛紛
空谷絕樵聲長路無行塵呀呀垂涎口眈眈闕城

闔天地豈不仁社公豈不神哀哀太山婦叫斷秋
空雲可憐封使君生不治民死食民世上無復裴
將軍北平太守今何人

寄趙宜之

趙時在
盧氏

大城滿豺虎小城空雀鼠可憐河朔州人掘草根
官煮弩北人南來向何處共說莘川今樂土莘川
三月春事忙布穀勸耕鳩喚雨舊聞抱犢山摩雲
出蒼稜長林絕壑人迹所不到可以避世如武陵

全金詩卷六十四
三
煮橡當果穀煎木甘飴餉此物足以度荒歲况有
麋鹿可射魚可罾自我來嵩前旱乾歲相仍耕田
食不足又復違親朋三年西去心籠禽念飛騰一
瓶一鉢百無累恨我不如雲水僧崧山幾來層不
畏登不得但畏不得登洛陽一夕秋風起羨殺雲
間一作吳中張季鷹

紀子正杏園燕集 甲午歲

紀翁種杏城西垠千株萬株紅豔新今年寒食好

天色曉氣鬱鬱含芳津天公自愛此花好朝薰莫
染煩花神融霞暈雪一傾倒非烟非霧非卿雲未
開何所似乳兒粉妝淡絳脣能唬能笑癡復駭畫
出百子元非真半開何所似里中處女東家鄰陽
和入骨春思動欲語不語時輕輦就中爛熳尤更
好五家合隊號與秦曲江江頭看車馬十里羅綺
爭紅塵陽平一邑多詩豪主人買酒邀衆賓花時
有成約恨少楊子張吾軍落花著衣紅繽紛四坐

慘澹傷精魂花開花落十日耳對花不飲花應嗔
愛花常苦得花晚爭教行樂無閒身芳苞一破不
更合且看錦樹烘殘春

王黃華墨竹

爲郭輔之賦

古來畫竹尊右丞東坡歛袂不敢評開元石本出
摹寫燕市駿骨留空名亦有文湖州畫意不畫形
一爲坡所賞四海知有篔簹亭深衣幅巾老明經
老死不敢言縱橫豈知遼江一派最後出運斤成

風刃發劖雪溪仙人詩骨清畫筆尚餘詩典刑月
中看竹寫秋影清鏡平明白髮生娟娟畧似萱草
詠落落不減叢臺行千枝萬葉何許來但見醉帖
字欹傾君不見忠恕大篆草書法趙生怒虎喫墨
成至人技進不名技遊戲亦復通真靈百年文章
公主盟屏山見之蹠且擎聲光舊塞天壤破議論
今著兒曹輕有物於此鳴不平悲邪嘯邪誰汝令
只恐破窗風雨夜怒隨雷電上青冥

泛舟大明湖

待杜子不至

長白山前繡江水展放荷花三十里看山水底山
更佳一堆蒼烟收不起山從陽丘西來青一彎天
公擲下半玉環大明湖上一杯酒昨日繡江睂曉
間晚涼一櫂東城渡水暗荷深若無路江妃不惜
水芝香狼籍秋風與秋露蘭襟鬱鬱散芳澤羅襪
盈盈見微步晚晴一賦畫不成枉著風標誇白鷺
我時驂鸞追散仙但見金支翠蕤相後先眼花耳

熱不稱意高唱吳歌叩兩舷喚取樊川搖醉筆風
流聊與副付他年

九月七日夢中作詩續以末後二句

桃花紅深李花白昨日成團今日拆歌聲滿耳何
處來楊柳青旗洛陽陌撫君背握君手朝鐘莫鼓
無了期世事於人竟何有青青鏡中髮忽忽成白
首六國印何如負郭二頃田千載名不及卽時一
杯酒

湧金亭示同遊諸君

太行元氣老不死上與左界分山河有如巨鼇昂
頭西入海突兀已過餘坡陀我從汾晉來山之面
目腹背皆經過濟源盤谷非不佳烟景獨覺蘇門
多湧金亭下百泉水海眼萬古留山阿鬪沸灤水
源澹淪晉溪波雲雷涵鬼物窟宅深蛟鼉水妃簸
弄明月璣地藏發泄天不訶平湖油油碧於酒雲
錦十里翻風荷我來適與風雨會世界三日漫兜

羅山行不得山北望空長哦今朝一掃衆峯出千
鬟萬髻高峨峨空青斷石壁微茫散烟蘿山陽十
月未搖落翠蕤雲旂相盪摩雲烟故爲出濃淡魚
鳥似欲留婆娑石閒仙人迹石爛迹不磨仙人去
不返六龍忽蹉跎江山如此不一醉撫掌笑殺孫
公和長安城頭烏尾訛并州少年夜枕戈舉杯爲
問謝安石蒼生今亦如卿何元子樂矣君其歌

南冠行

癸巳秋爲
曹得一作

南冠纍纍渡河關畢逋頭白乃得還荒城雨多秋
氣重頽垣敗屋深茅管漫漫長夜浩歌起清涕曉
枕留餘潛曹侯少年出紈綺高門大屋乖楊裏諸
房三十侍中郎獨守殘編北窗底王孫上客生光
輝竹花不實鷓鴣饑絲桐切切解人語海雲喚得
青鸞飛梁園三月花如霧臨錦芳華朝復莫阿京
風調阿欽才暈碧裁紅須小杜長安張敞號眉嫵
吳中周郎知曲悞香生春動一詩成瑞露靈芝滿
窗戶魚龍吹浪三山沒萬里西風入華髮無人重
典鷓鴣裘展轉空牀臥秋月寶鏡埋寒灰鬱鬱萬
古不可開龍劍出地底青天白日驅雲雷層冰千
里不可留離魂楚些招歸來生不願朝入省莫入
臺願與竹林嵇阮同舉杯郎食猩猩脣妾食鯉魚
尾不如孟光案頭一盃水黃河之水天上流何物
可煮人間愁撐霆裂月不稱意更與倒翻鸚鵡洲
安得酒船三萬斛與君轟醉太湖秋

題劉紫微堯民野醉圖

蒼苔濁酒同歌呼白鬚紅頰醉相扶堯時皇質未
全散不論朝野皆歡虞望雲雲非雲就日日非日
先秦迂儒強解事極口譽堯初未識堯民與酒同
一天此外更誰爲帝力仙老曾經甲子年戲將陳
迹畫中傳山川淳朴忽當眼迴望康衢一慨然

一本

無此

不見只今汾水上田翁鞭背出租錢

堯甲子
年仙人

張果
事

下黃榆嶺

北崖玄武莫黓黑如積鐵東厓劫火餘絢爛開錦
纈就中嶺頭一峯凸樸奇剩費寒雲幾千疊摩圍
可望不可到青壁無梯猿叫絕林烟日射彩翠新
跬步疑有黃金闕畫工胸次墨汁滿那得冰壺貯
秋月直須潮陽老筆迴萬牛露頂張顛揮醉帖石
門細路無暗泉行人饑渴挽不前辛苦黃榆三十
里豈知却有看山緣

驅豬行

黃臺張氏莊作

沿山蒔苗多費力辦與豪豬作糧食草菴架空尋
丈高擊版搖鈴鬧終夕孤犬無猛噬長箭不暗射
田夫睡中時叫號不似驅豬似稱屈放教田鼠大
於兔任使飛蝗半天黑害田爭合到渠邊可是山
中無橡木長牙短喙食不休過處一抹無禾頭天
明隴畝見狼籍婦子相看空淚流旱乾水溢年年
日會計收成纔什一資身百倍粟豆中儋石都能

幾錢直兒童食糜須愛惜此物羣豬口中得縣吏
卽來銷稅籍

遊龍山

曩予尉大梁得交此州雷與劉自聞兩公誇南山
每恨南海北海風馬牛老龍面目今日始一見更
信造物工雕鏤是時山雨晴平田綠油油並山涼
氣多况得通深幽山泉谷口出迎客石罅戛擊琳
琅球蜿蜒入微行漸覺藤蘿罨衣樹打頭惡木拉

金言詩卷六十四
三
颺棲直幹比指稠石門無風白日靜自是林響寒
颺颺一峯忽當眼仰看看不休一峯一峯千百峯
雖欲一一顧揖知無由金城偃蹇不得上瑤臺回
合如相留苔花萬錦石丹碧爛不收天關守虎豹
武庫開戈矛小山隨起隨偃仆獨立千仞絕頂縹
緲之飛樓百花岡頭籍草坐瀟灑正直金蓮秋亭
亭妙高臺玉斧何年修登高覽元化快如鷹脫鞵
山靈故爲作開闢巧與詩境供冥搜白雲何許來

纖絲弄輕柔蓬萊作霧湧飄飄與烟浮玉衣仙人
鞭素蚪翕忽變化令人愁須臾視六合浩蕩不可
求初疑陶輪比運甕今悟夜壑真藏舟劫石拂未
窮杞國浪自憂斷鼇立極萬萬古爭遣起滅如浮
漚快哉萬里風一掃天四周誰言太始再開闢日
馭本自無停輶舉手謝山靈就無清涼毫相非神
羞賤子貪名山客刺已屢投黃華挂鏡臺天壇避
秦溝太山神明觀二室汗漫遊胸中隱然復有此

大物便可揮斥八極隘九州玉峯有佳招絕唱須
一酬爲君揆囊擲下珊瑚鈎白雲相望空悠悠異
時華表見老鶴姓字莫忘元丹丘

遺山游神川與
李冶張德輝結

吟社稱龍
山三老

遊泰山

泰山天壤閒屹如鬱蕭臺厥初造化手辦此何雄
哉天門一何高天險若可階積蘇與累塊分明見
九垓扶搖九萬里未可誣齊諧秦皇憺威靈茂陵

亦雄材翠華行不歸石壇滿蒼苔古今一俯仰感
極令人哀是時春夏交紅綠無邊涯奇探忘去聲登

頓意愜自遲回惜無賞心人歡然盡餘杯夜宿玉
女祠崩犇湧雲雷山靈見光怪似喜詩人來雞鳴
登日觀四望無氛霾六龍出扶桑翻動青霞堆平
生華嵩遊茲山未忘懷十年望齊魯登臨負吟鞵
孤雲拂層崖青壁落落雲閒開眼前有句道不得
但覺胸次高崔嵬徂徠山頭喚李白吾欲從此觀

蓬萊

遊承天懸泉

詩人愛山愛徹骨十月東來犯冰雪懸流百里行
不前但覺飛湍醒毛髮閒閒老仙去久石壁姓
名苔蘚滑此翁可是六一翁四十二年如電抹并
州之山水所泐駭浪幾轟山石裂只知晉陽城西
天下稀娘子關頭更奇劂周南留滯何敢歎投老
天教探禹穴君不見管涔汾源大車輪平泉丈八

玻璃盆不知承天此水何所本乃與沈瀆爭雄尊
平地突出隨崩犇洶如頽波射天門太初元氣未
凝結更欲何處留胚臙素蚪騰擲翠蛟舞袞袞後
出皆鱷鯤雷車怒擊冰雹散石峽峻滑蒼烟屯憑
崖下視心魄動自媿氣衰筆老勝槩過眼無繇吞
少東水簾亦瀟灑珠琲一一明朝暎陽龍暗滋瑤
草活礮石自與蓮湯溫神祠水之滸儀衛盛官府
頗怪祠前碑稽考失莽魯吾聞尹革臺胎宣汾洮

障大澤自是生有自來歸有所假而自經溝瀆便
可尸祝之祀典紛紛果何取子胥鼓浪怒未洩精
衛銜薪心獨苦楚臣有問天不酬肯以誕幻虛荒
驚聾瞽宇宙有此水萬古萬萬古人言主者介山
氏且道未有介山之前復誰主山深地古自是有
神物不假靈真誰敢侮稗官小說出閭巷社鼓邨
簫走翁媪當時大曆十才子爭遣李諶鑿陋語石
林六月清無暑人家青紅濕窗戶射鹿有場魚有

浦好築漕臺俯洲渚甕面椰瓢挹膏乳醉扶紅袖

別吳歌風雨不憂驚妬女

間閒公守平定以大安庚午來遊迄今壬子四

十三年矣土俗傳介子推被焚其妹介山氏恥兄
要君積薪自焚號曰妬女祠碑大曆中制官李諶
所誤辭旨殊謬至有百日積薪一日燒之之語鄉
社至今以百五日積薪而焚之謂之祭妬女云

全金詩卷六十四

御訂全金詩增補中州集卷六十五

金元好問原本

元好問三

天門引

秦王宮中

一作深居

不得近從破衡成欲誰信白頭遊

客困咸陽顛顛黃金百斤盡海中仙人黃鶴

一作鶻

全金詩卷六十五

舉大笑人間爭腐鼠丈夫何意作蘇秦六印才堪
驚兒女古來多爲虛名老不見阿房淨如埽千年
虎豹守天門一日牛羊卧秋草

蛟龍引

古劍咸陽墓中得抉開青雲見白日蛟龍地底氣
如虹土花千年不敢蝕洪鑪烈焰初騰精橫海已
覺無長鯨世上元無倚天手匣中誰解不平鳴割
城恨不逢相如行酒恨不逢朱虛尚方未入朱雲

請盟盤合與毛生俱誰念田文坐中客只將彈鋏
歎無魚

湘夫人詠

木蘭芙蓉滿芳洲白雲飛來北渚游千秋萬歲帝
鄉遠雲來雲去空悠悠秋風秋月沅江渡波上寒
煙引輕素九疑山高猿夜嘯竹枝無聲墮殘露

孤劍詠

鬱鬱重鬱鬱夜半長太息吟成孤劍詠門外山鬼

泣清霜稜稜風入骨殘月耿耿燈映壁君不見一
飢縛壯士僵卧時自惜黃鵠一舉摩蒼天時念樊
籠束脩翼

渚蓮怨

阿溪何許來素面浣風雨寂寞煙中魂依依欲誰
語

芳華怨

娃兒十八嬌可憐亭亭裊裊春風前天上仙人玉

爲骨人間畫工畫不出小小油壁車軋軋出東華
金縷盤雙帶雲裾踏鴈沙一片朝雲不成雨被風
吹去落誰家少年豈無恩澤侯金鞍繡帽亦風流
不然典取鸚鵡裘四壁相如堪白頭金谷樓臺悄
無主燕子不來花著雨只知環珮作離聲誰向琵琶
得私語無情鷓鴣翡翠兒有情蜂雄蛺蝶雌勸
君滿酌金屈卮明日無花空折枝

後芳華怨

江南破鏡飛上天三五二八清光圓豈知汴梁破
來一千日寂寞菱花仍半邊白沙漫漫車轆轤
鷄絃中杜鵑哭塞門顛顛人不知枉爲珠娘怨金
谷樂府初唱娃兒行彈棋局平心不平只今雄蜂
雌蝶兩不灰老眼天公如有情白玉搔頭綠雲髮
玫瑰面脂透肉滑春風著人無氣力不必相思解
銷骨落花絕品姚家黃揚州銀紅一國香千圍萬
繞看不足雨打風吹空斷腸丹砂萬年藥金印九

一作八

州督不及秦宮一生花裏活長門曉夕壽相

如儘著千金買消渴

結楊柳怨

長樂坡前一

一作一百

杯酒鄭重行人結楊柳可憐楊

柳千萬枝

一作一條

看看盡入行人手輕煙細雨綠相

和惱亂春風態度多路人愛是

一作此

風流樹無奈

朝攀莫折何朝攀莫折何時了不道行人暗中老
素衣今日洛陽塵白髮明朝塞城草柳色年年歲

歲青關人何事管離情春風誰向丁寧道折斷

一作

盡長

一作柔一作垂

條莫再生

秋風怨

碧瓦高梧響疎雨。坐倚薰籠時獨語。守宮一著灰。生休狗走雞飛莫為女。雲間簫鼓夜厭厭。禁漏誰將海水添。一春門外羊車過。又見秋風拂翠簾。總把丹青怨延壽。不知猶有竹枝鹽。

歸舟怨

渡頭楊柳青復青。閨中少婦動離情。只從問得狂夫處。夜夜夢到洛陽城。南風吹櫓聲北鴈鳴。嚶嚶江流望不極。相思春草生。

征人怨

瀚海風煙埽易空。玉關歸路幾時東。塞垣可是秋

寒早。一夜清霜入

一作滿

鏡中

塞上曲

平沙細草散羊牛。幾

一作

簇征人在戍樓。忽見隴

頭新鴈過一時回首望南州

西樓曲

游○絲○落○絮○春○漫○漫○西○樓○曉○晴○花○作○團○樓○中○少○婦○弄
瑤○瑟○一○曲○未○終○坐○長○歎○去○年○與○郎○西○入○關○春○風○浩
蕩○隨○金○鞍○今○年○疋○馬○妾○東○還○零○落○芙○蓉○秋○水○寒○并
刀○不○翦○東○流○水○湘○竹○年○年○淚○一作痕紫○海○枯○石○爛
兩○鴛○鴦○只○合○雙○飛○便○雙○歿○重○城○車○馬○紅○塵○起○乾○鵲
無○端○爲○誰○喜○鏡○中○獨○語○人○不○知○欲○插○花○枝○淚○如○洗

後平湖曲

越○女○顏○如○花○吳○兒○潔○於○玉○天○教○竝○牆○居○不○著○同○被
宿○美○人○一○笑○千○黃○金○連○城○不○博○百○年○心○樓○上○牆○頭
無○一○物○莫○爨○朝○春○一○生○足○秋○風○拂○羅○裳○秋○水○照○紅
妝○舉○頭○見○郎○至○低○頭○采○蓮○房○郎○心○只○如○菱○刺○短○妾
意○未○覺○藕○絲○長○與○郎○期○何○許○眼○礙○同○舟○女○春○波○澹
澹○無○盡○情○雙○星○盈○盈○不○得○語○十○里○平○湖○艇○子○遲○岸
花○汀○草○伴○人○歸○鴛○鴦○驚○起○東○西○去○惟○有○蜻○蜓○接○翅

飛

長安少年行

黃衫少年如玉筆生長侯門人不識道逢豪客問
姓名袖把金鞭側身揖卧馳行橐錦帕蒙石榴壓
漿銀作筒八月蒼鷹一片雪五花驕馬四蹏風日
莫新豐原上獵三更歌舞灞橋東

黃金行 贈王飛伯

王郎少年詩境新氣象慘澹含古春筆頭仙語復

鬼語只有溫李無他人天公著詩貧子身子曾不
知乃自神人間不買詩名用一片青衫衡霍重兒
貧女富母兩心何論同袍不同夢入門喚婦不下
機淚子垢面兒啼饑君詩只有貧女謠何曾夢見
金縷衣外家翁媪日有語嫁女書生徒爾為昆陽
城下三更酒醉膽輪困插星斗一夕 一作昔 詩腸老
蛟吼十尺長人墮車走斫頭不屈三萬言欲向何
門復低首何人壽我黃金千使君破鏡飛上天

隋故宮行

渭川楊柳先得春二月鶯嘯百轉新長春宮中千
樹錦暖日晴雲思殺人君王半醉唱吳歌絳仙起
舞頰翠蛾吳兒謾說曾行樂三十六宮能幾多千
秋萬古金銀闕海沒三山一毫髮繁華夢覺人不
知留得寒螿泣秋月

解劔行

古劔黑於漆鬱鬱動星文摩挲二十年今日持贈
君長鯨鼓浪三山沒知君不是泥中物袖閒一卷
白猿書未分持刀買黃犢壯懷風雲鬱沈沈慚媿
漂母無千金長安侏儒飽欲死萬古不解天公心
北風浩浩吹行客隴水無聲雪花白荆卿墓頭秋
草乾擊筑行歌欲誰識君不見秦相五殺皮去時
烹雞吹戾戾又不見敝裘蘇季子合從歸來印纍
纍丈夫墮地自有萬里氣翕忽變化安能知大冠
如箕望吾子富貴同生亦同死

征西壯士謠
三十未有二十強手內蛇矛丈八長總爲官家金
印大不怕百死向沙場捉却賀蘭山下賊金鞍繡
帽好還鄉

望雲謠

涉江采芙蓉芙蓉待秋風登山采蘭苕蘭苕霜早
彫美人亭亭在雲霄鬱搖行歌不可招湘絃沈沈
寫幽怨愁心歷亂如曳繭金支翠蕤紛在眼春草

迢迢春波遠

望歸吟

塞雲一抹平如截塞草離離卧榆葉長城窟深戰
骨寒萬古牛羊飲冤血少年錦帶佩吳鉤獨騎疋
馬覓封侯去時只道從軍樂不道關山空白頭北
風吹沙雜飛雪弓弦有聲凍欲折寒衣昨夜洛陽
來腸斷空閨擣秋月年年歲歲望還家此日歸期
轉未涯誰與南州問消息幾時重拜李輕車

梁園春五首

車駕遷汴京後作

軍從南去三回勝雪自冬來二尺強今歲長春多

樂事內家應舉萬年觴

長春德陵誕節名

暖入金溝細浪添津橋楊柳絲纖纖賣花聲動天

街遠幾處春風揭繡簾

上苑春濃晝景閒綠雲紅雪擁三山宮牆不隔東

風斷偷送天香到世閒

樓觀沈沈細雨中出牆花木亂青紅朱門不解藏

春色燕宿鶯啼處處通

雙鳳簫聲隔綵霞宮鶯催賞玉谿花誰憐麗澤門

邊柳瘦倚東風望翠華

龍德宮有玉谿館麗澤燕都西門名

探花詞三首

禁裏蒼龍啓九關殿前鸚鵡喚新班沈沈綠樹鞭

聲遠嫋嫋薰風扇影閒

浩蕩春風入繡鞍可憐東野一生寒皇州花好無

人管不用新郎走馬看

六十人中數少年風流誰占探花筵阿欽正使才
情盡猶欠張郎白玉鞭

李欽用二十七張夢祥少一歲又未婚云

獵城南

翩翩游俠兒白馬如疋練朝出城南獵莫趁軍中
宴北平有真虎愛惜腰閒箭

春風來

春風來時瑤草芳綠池珠樹宿鴛鴦春風去後瑤
草歇來鴻去鴈遙相望鴛鴦不得雙燕鴻天一方

娟娟愁睂色靜與遙山長錦衾復羅薦夢語相思
怨月明烏夜唳空閨淚如霰

并州少年行

北風動地起天際浮雲多登高一長嘯六龍忽蹉
跎我欲橫江鬪蛟鼉萬弩迸射陽侯波或當大獵
燕趙閒黃熊朱豹皆遮羅男兒萬馬隨搗訶朝發
細柳莫朝那埽雲黑山布陽和歸來明堂見天子
黃金橫帶冠峩峩人生只作張騫傅介子遠勝僵

死空山阿君不見并州少年夜枕戈破屋耿耿天
垂河欲眠不眠淚滂沱著鞭忽記劉越石拔劍起
舞雞鳴歌東方未明兮奈夜何

續小娘歌十首

吳兒沿路唱歌行十五五和歌聲唱得小娘相
見曲不解離鄉去國情
北來游騎日紛紛斷岸長隄是陣雲萬落千邨藉
不得城池留著護官軍

山無洞穴水無船單騎驅人動數千直使今年留
得在更教何處避明年

青山高處望南州漫漫江水遶城流願得一身隨
水去直到海底不迴頭

風沙昨日又今朝踏碎鷓鴣頭路更遙不似南橋騎
馬日生紅七尺繫郎腰

鴈鴈相送過河來人歌人哭鴈聲哀鴈到秋來却
南去南人北渡幾時回

竹溪梅鳴靜無塵二月江南烟雨春傷心此日河
平路千里荆榛不見人

太平婚嫁不離鄉楚楚兒郎小小娘三百年來涵
養出却將沙漠換牛羊

饑鳥坐守草間人青布猶存舊領巾六月南風一
萬里若爲白骨便成塵

黃河千里扼兵衝虞虢分明在眼中爲向淮西諸

將道不須誇說蔡州功

此爲宋助攻
蔡州而發

懷益之兄

世故伊川歎鄉情越客音天宜他日定陸已向來
沈冉冉愁看老源源事益侵誰言易排遣自分不
勝任鞭影驚疲馬鐘聲急莫禽跼中無曠迹喧外
有幽等夢失名家筆書存遺子金山田和石瘦茅
屋過雲深春雨蔬成圃秋霜柿滿林樹陰涼拂席
花氣澹盈襟宿鷺窺晨汲孤猿伴暝吟溪僧時問
字野客或知琴抱璞休奇售臨觴得緩斟阿一作同

兄團聚日曾語一作百年心

汴禪師自斲普照石一作為研以詩見餉為

和二首

寺廢瓦不毀研奇功亦多已知良斲少更奈苦心
何挺挺剛無敵津津潤可呵羽陽陵谷變冰井字
書訛贈比黃金璞辭慙紫石歌遙知玉音在洗耳
俟研磨長吉有紫石研歌
點化鉛仍見堅凝鐵易穿何年埋朽壤此日睹青

天古色秋煙重哀音夜雨懸有刀堪切玉是鏡不
名甄佛廕淪空劫書林結後緣禪河一勺水更擬
就師傳

癸巳除夜

鼎定周元重薪安漢已然不隨南渡馬虛泛北歸
船身竝枯蝸化心爭脫兔先塵埃嗟落泊光景強
留連往事青燈裏浮生白髮前更殘鐘未動猶屬
出京年

病中

病因食豬動氣而作癸卯四月二十一日晨起書

戰勝頗自恃，寧知從外腴。
 文章工作崇，時運迫摧枯。
 止酒嗟何及，燒豬本不圖。
 膏梁無急變，山澤有真臞。
 詩信藤條戲，方遭鐵彈誣。
去聲紅忘後，顧鰲黑見前。
 驅眩入投牀，仆晨淹伏枕。
 呼萬錢，惟嘔泄一嚮爾。
 乘除靜，伏心仍悸深。
 調息亦麤跼，嫌囚宇宙渴。
 憶卷江湖風，柳留蟬蛻霜。
 松映鶴孤養，和懲往失。
几名養和事見天隨子詩扶老念時須，
 杯杓歸神誓垣牆。

任佛踰回蹊，且垂翅望或在桑榆。

老樹

老樹高留葉，寒藤細作花。
 沙平時泊鴈，野迥已攢鴉。
 旅食秋看盡，行吟日又斜。
 干戈正飄忽，不用苦思家。

陽翟道中

長路伶俜裏，羈懷蒼莽中。
 千山分晚一作落照，萬籟入秋風。
 頻見參旗縮，虛傳朔幕空。
 故園歸未得，細

○
問北來鴻

太室同希顏賦

壯矣崧維嶽盤盤上窅冥中天瞻巨鎮元氣有遺
形雨入秦川黑雲開楚岫青鼇掀一柱在萬古壓
坤靈

送登封張令西上

罷縣人稱屈悠悠復此行渭城秋鴈到秦嶺莫雲
平道路衣從典風塵劍已鳴山西多俠客莫說是

書生

送曹吉甫兼及通甫

意氣羨君豪憐君屈騎曹安能事筆硯且復混弓
刀風雪貂裘暗關山馬骨高南飛見鴻鴈應爲惜
哀勞

勝槩

三鄉作

勝槩煙塵外新詩杖屨閒偶隨流水去澹與莫雲
還吾道三緘口時情一解顏從今便高卧已負半

生閒

少室南原

地僻人煙斷山深鳥語譁清溪鳴石齒暖日長藤
芽綠映高低樹紅迷遠近花林間見雞犬直擬是
仙家

落魄

落魄宜多病艱危更百憂雨聲孤館夜草色故園
秋行役魚鱗尾歸期烏白頭中州遂南北殘息副

付

悠悠

長壽新居

同仲
經賦

地古邨墟迴川迴縣郭斜蒲池餘老節菊水引

去聲

新芽卜築欣成趣歸耕覺有涯迎門顧兒女今日
是山家

十二月六日二首

俚鬼跳梁久羣雄結構牢天機不可料世網若爲
逃白骨丁男盡黃金甲第高閭門隔九虎休續楚

臣騷

海內兵猶滿天涯歲又新龍移失魚鼈日食鬪麒麟
麟草棘荒山雪煙花故國春聊城今夜月愁絕未
歸人

短日

短日礮聲急重雲鴈影深風霜侵晚節天地入歸
心零落溝中斷酸嘶爨下音五年朝與夕清血幾
沾襟

送楊次公兼簡秦彥容李天成

海國山如染雲堆草易荒時危頻虎穴路絕更羊
腸弔影雙蓬鬢攜家一藥囊殷勤秦與李無惜借
餘光

倪莊中秋 巳亥

強飯日逾瘦袂衣秋已寒兒童漫相憶行路豈知
難露氣入茅屋溪聲喧石灘山中夜來月到曉不
曾看

陽興砦

亂石通樵逕重岡擁戍城山川帶淳朴雞犬見升
平雨爛沙仍軟秋偏氣自清年年避營馬幾向此
中行

由州入府避騎兵
奪馬者多由此路

聚仙臺夜飲

永夜留歡席高懷遠市塵月涼衣有露風細酒生
鱗鄉社情親舊仙臺姓字新殷勤詩卷在長記座
中人

九月晦日王邨道中

水涸沙仍濕霜餘草更幽煙光藏落景山骨露清
秋坐食知何益行吟只自愁隨陽見鴻鴈三歎惜
淹留

十月四日往關南

行路見新月獨行還獨謠勞生塵袞袞晚色鬢蕭
蕭野曠無遺穗林疎有墮樵回頭麥山嶺更覺馬
蹏遙

和仲梁

林影兼秋薄雲陰帶晚涼石潭魚近藻沙渚鴈留
一作
霜笑語無長路登臨豈異鄉一罇堪共醉惜
不是重陽

感事

壯事本無取老謀何所成人皆傳已死吾亦厭餘
生潦倒封侯骨淹留混俗情百年堪一笑辛苦惜
虛名

同龔文明秀山行

莫景披橫幅山閒二老同雲如愁戍苦雪亦笑詩
窮古木凍欲折斷崖行復通從今胡谷夢時到水
聲中

庚子三月十日作

殘夢忘書帙餘寒滯酒杯青銅元嬾照白紵更寬
裁水際時獨往花邊知幾迴殷勤雙語燕應自謝
家來

八月并州鴈

三鄉
時作

八月并州鴈。清汾照旅羣。一聲驚晚笛。數點入秋雲。滅沒樓中見。哀勞枕畔聞。南來還北去。無計得隨君。

甲寅十二月四日出鎮陽寄宰魯伯

滹水曉光動。灞橋詩境同。衝寒騎瘦馬。認影識衰翁。長路風聲裏。孤城雪意中。迴頭歌笑處。凄絕意何窮。

乙卯十一月往鎮州

邨靜鳥聲樂。山低鴈影遙。野陰時澗朗。冷雨只飄蕭。涉遠心先倦。衝寒酒易消。紅塵忘南北。渺渺見長橋。

同姚公茂徐溝道中聯句

路轉川塗濶。天低雨氣昏。縣山連漢壘。汾水入并門。姚來往頻鞍馬。登臨負酒樽。聯詩強一笑。凄絕恐銷魂。

詠懷

崧山
中作

涼葉蕭蕭散雨聲
虛堂浙浙掩霜清
黃花自與西風約
白髮先從遠客生
吟似候蟲秋更苦
夢和寒鵲夜頻驚
何時石嶺關頭路
一望家山眼暫明

帝城

史院夜
直作

帝城西下望孤雲
半廢晨昏媿此身
世俗但知從仕樂
書生只合在家貧
悠悠未了三千牘
碌碌翻隨十九人
預遣兒書報歸日
安排雞黍約比隣

僕射陂醉歸卽事

多生曾得江湖樂
每見陂塘覺眼明
詩酒共尋前日約
風陰新自夜來晴
春波澹澹沙鳥沒
野色荒荒煙樹平
醉踏扁舟浩歌起
不須紅袖出重城

是日

招樂府
不至

春日

里社春盤巧欲爭
裁紅暈碧助春情
忽驚此日仍為客
却想當年似隔生
貧裏壘鹽憐節物
亂來歌

吹失懽聲南州剩有還鄉伴戎馬何時道路清

歐陽

詹春盤賦裁紅暈
碧巧助春情爲韻

橫波亭爲清口帥賦

孤亭突兀插飛流氣壓元龍百尺樓
萬里風濤接瀛海千年豪傑壯山丘
疎星澹月魚龍夜老木清霜鴻鴈秋
倚劔長歌一杯酒浮雲西北是神州

野菊座主閒閒公命作

柴桑人去已千年細菊班班也自圓
共愛鮮明照

秋色爭教狼籍卧疎煙荒畦斷壟新霜後
瘦蝶寒蟬晚景前只恐春叢笑遲莫
題詩端爲發幽妍

昆陽二首

古木荒煙集暮鴉高城落日隱悲笳
并州倦客初投迹楚澤寒梅又過花
滿眼旌旗驚世路閉門風雪羨山家
忘憂只有清樽在暫爲紅塵拂鬢華
去日黃花半未開南來忽復見寒梅
淹留歲月無餘物料理塵埃有此杯
老馬長途良憊矣白鷗春

水亦悠哉商餘說有滄洲趣早晚乾坤入釣臺

葉縣雨中

時崧前
旱尤甚

春旱連延入麥秋今朝一雨散千憂龍公有力迴
枯槁客子何心歎滯留多稼卽看連楚澤歸雲應
亦到崧丘兵塵浩蕩乾坤滿未厭明河拂地流

穎亭

頽上風煙天地迴穎亭孤賞亦悠哉春風碧水雙
鷗靜落日青山萬馬來勝槩銷沈幾今昔中年登

覽足悲哀遠遊擬續騷人賦所惜怱怱無酒杯

三四

二句又見張希孟會波樓詩
蹈襲之病昔人亦不免耶

山中寒食

小雨班班浥曙煙平林簇簇點晴川清明寒食連
三月穎水崧山又一年樂事漸隨花共減歸心長
與鴈相先平生最有登臨興百感中來只慨然

楚漢戰處

同欽
叔賦

虎擲龍拏不兩存當年曾此賭乾坤一時豪傑多

全金詩卷六十五
皆一作行陣萬古山河自壁門原野猶應厭膏血風

雲長遣動心魂成名豎子知誰謂擬喚狂生與細
論

後灣別業

薄雲晴日爛烘春高柳清風便可人一飽本無華
屋念百年今見老農身童童翠蓋桑初合濼濼蒼
波麥已勻便與溪塘作盟約不應重遣濯纓塵

寄欽用

顛顛京華苜蓿盤南山歸興夜漫漫長門有賦人
誰買坐榻無瓊客亦寒蟲臂偶然煩造物麀頭何
者亦求官故人東望應相笑世路羊腸乃爾難

內鄉縣齋書事

吏散公庭夜已分寸心牢落百憂熏催科無政堪
書考出粟何人與佐軍饑鼠遶牀如欲語驚鳥嘯
月不堪聞扁舟未得滄浪去慚媿春陵老使君

遠祖

次山春陵行云思欲委符節引竿自
刺船故子美有興含滄浪清之句

被檄夜赴鄧州幕府

幕府文書烏羽輕
敝裘羸馬月三更
未能免俗私自笑
豈不懷歸官有程
十里陂塘春鴨鬧
一川桑柘晚煙平
此生只合田間老
誰遣春官識姓名

除夜

一燈明暗夜如何
夢寐衡門在澗阿
物外煙霞玉華遠
花時車馬洛陽多
折腰真有陶潛興
扣角空傳甯戚歌
三十七年今日過
可憐出處兩蹉跎

劉光甫內鄉新居

薦冠平日凜秋霜
老去聲名只閉藏
父老漸來同保社
兒童久已愛文章
蔬隨隙地皆成圃
竹放新梢欲過牆
爲向長安舊遊道
世閒元有北窓涼

西齋夜宴

時爲內鄉令

飄零無物慰天涯
酒伴相逢飲倍加
誤謬君當畧彭澤
迴旋我亦笑長沙
金釵翠鞞迎春髻
銀燭光搖半夜花
只欠東山游錄事
不來堅坐看紛華

叔能

信之張杜諸人皆
在而麟之獨不至

出山

松門石逕靜無關
布韞青鞵幾往還
少日漫思爲世用
中年直欲伴僧閒
塵埃長路仍回首
升斗微官亦強顏
休道西山不留客
數峰如畫莫雲間

石門

兩崖懸一作橫絕倚山垠
草逕低迷劣可分
潭影乍

從明處見竹香
偏向靜中聞
石林萬古不知暑
茅

屋四鄰惟有雲
曳杖行歌羨樵叟
此生何計得隨君

岐陽三首

突騎連營鳥不飛
北風浩浩發陰機
三秦形勝無今古
千里傳聞果是非
偃蹇鯨鯢人海涸
分明蛇犬鐵山圍
窮途老阮無奇策
空望岐陽淚滿衣
百二關河草木橫
十年戎馬暗秦京
岐陽西望無來信
隴水東流聞哭聲
野蔓有情縈戰骨
殘陽何

意照空城從誰細向蒼蒼問爭遣蚩尤作五兵

眈眈九虎護秦關懦楚孱齊机上看禹貢土田推

陸海漢家封檄自

一作盡

天山北風獵獵悲笳發渭

水蕭蕭戰骨寒三十六峰長劔在倚天仙掌惜空

閒

雨後丹鳳門登眺

絳闕遙天霽景開金明高樹晚風迴長虹下飲海

欲竭老鴈叫雲

一作群

秋更哀劫火有時歸變滅神

嵩何計得飛來窮途自覺無多淚莫傷殘陽望吹
臺

懷秋林別業

茅屋蕭蕭浙水濱豈知身屬洛陽塵一家風雪何
年盡二頃田園入夢頻高樹有巢鳩笑拙空牆無
穴鼠嫌貧西南遙望腸堪斷自古虛名只誤人

壬辰十二月車駕東狩後即事五首

翠被息息見執鞭戴盆鬱鬱夢瞻天只知河朔歸

全金言卷六十五
三
銅馬又說臺城墮紙鳶血肉正應皇極數衣冠不
及廣明年何時真得攜家去萬里秋風一釣船
慘澹龍蛇日鬪爭干戈真欲盡生靈高原水出山
河改戰地風來草木腥精衛有冤填瀚海包胥無
淚哭秦庭并州豪傑知一作今誰在莫擬分軍下井
陘

鬱鬱圍城度兩年愁腸饑火日相煎焦頭無客知
移突曳足何人與共船白骨又多兵死鬼青山元

有地行仙西南三月音書絕落日孤雲望眼穿
萬里荆襄入戰塵汴州門外卽荆榛蛟龍豈是池
中物蟣蝨空悲地上臣喬木他年懷故國野煙何
處望行人秋風不用吹華髮滄海橫流要此身
五雲宮闕露盤秋銀漢無聲桂樹稠複道漸看連
上苑戈船仍擬下揚州曲中青冢傳新怨夢裏華
胥失舊遊去去江南庾開府鳳凰樓畔莫迴頭

癸巳四月二十九日出京

塞外初捐宴賜金當時南牧已駸駸只知灞上真

兒戲誰謂神州竟

一作遂

陸沈華表鶴來應有語銅

槃人去亦何心興亡誰識天公意留著青城閱古

今

國初取宋於青城受降

喜李彥深過聊城

圍城十月鬼為鄰異縣相逢白髮新恨我不如南
去鴈羨君獨是北歸人言詩匡鼎功名薄去國虞
翻骨相屯老眼天公只如此窮途無用說悲辛

與張杜飲

故人寥落曉天星異縣相逢覺眼明世事且休論
向日酒樽聊喜似承平山公倒載群兒笑焦遂高
談四座驚轟醉春風一千日愁城從此不能兵

秋夕

小簾涼多睡思清一窓風雨送秋聲頻年但覺貂
裘敝萬古何曾馬角生寄食且依嚴尹幕附書誰
住鄧州城洗一作澆愁欲問東家酒恨殺寒雞不肯

鳴

夢歸

顛顛南冠一楚囚歸心江漢日東流青山歷歷鄉
國國夢黃葉蕭蕭風雨秋貧裏有詩工作祟亂來無
淚可供愁殘年兄弟相逢在隨分壘鹽萬事休

淮右

淮右城池幾處存宋州新事不堪論輔車謾欲通
吳會突騎誰當擣薊門細水浮花歸別澗斷雲含

雨入孤邨空餘韓偓傷時淚

一作語

留與纍臣一斷

魂

五六全用韓致光語即於結聯標出自成一體遺山詩用前人成語極多陶杜句尤甚又未可

以此例槩之也

秋夜

九死餘生氣息存蕭條門巷似荒邨春雷謾說驚
坏戶皎日何曾入覆盆濟水有情添別淚吳雲無
夢寄歸魂百年世事兼身事樽酒何人與細論

附金詩紀事案此詩為汴京之難言之也

金史文藝傳云天興二年春崔立變群小
附和請爲立建功德碑翟奕以尚書省命
召翰林直學士王若虛爲文時奕輩恃勢
作威人或少忤則橫遭讒構立見屠滅若
虛自分必死以理論之奕輩不能奪乃召
太學生劉祁麻革輩赴省元好問張信之
喻以立碑事曰衆議屬二君且已白鄭王
矣二君其無讓祁等固辭而別數日促迫

不已祁卽爲草定以副好問好問意未愜
乃自爲之旣成以示若虛乃共刪定數字
則當時碑文皆以爲裕之所作其不免於
物議可知詩中悲啣坯戶冤抱覆盆傷九
死之餘生慨百年之身世曹聽耳食實繁
有徒樽酒細論所以歎息於告語之無人
也然意含蓄未露其痛切言之者則見於
集中外家別業上梁文及元郝經伯常辨

磨甘露碑詩並錄於後以備攷

附外家別業上梁文云窮於途者返於家
乃人情之必至勞以生而佚以老亦天道
之自然方屬風霜叵薄之餘而有里社浮
湛之漸茲焉卜築今也落成遺山道人蟬
蠹書癡雞蟲祿薄猥以勃宰槃跚之跡仕
於危急存亡之秋左曹之斗食未遷東道
之戈船已御久矣公私之俱罄困於春夏

之長圍窮甚析骸死惟束手人望荆兄之
通好義均紀季之附庸出涕而女於吳莫
追於既往下車而封之杞有覬於方來謀
則僉同議當就抗爰自上書宰相所謂試
微軀於萬仞不測之淵至於喋血京師亦
常保百族於群盜垂涎之口皇天后土實
聞存趙之謀枯木死灰無復哭秦之淚初
一軍搆亂群小歸功劫太學之名流文鄭

人之逆節命由威制佞豈願為就磨甘露
御書之碑細刻錦溪書叟之筆蜀家降款
具存李昊之世修趙王禪文何預陸機之
手迹伊誰受賞於我嫁名悼同聲同氣之
閒有無罪無辜之謗耿孤懷之自信聽衆
口之合攻果吮癰舐痔之自甘雖竄海投
山其何恨惟彼證龜而作鼈始於養虺以
成虵追韓之騎甫還射羿之弓隨穀予北渡之

初獻書中令君請以一寺觀所費養天下名士造謗二三亦書中枚舉之類也以

流言之自止知神理之可憑復齒平民僅
延殘喘澤畔而湘纍已老樓中而楚望奚
窮懷先人之敝廬可憐焦土眷外家之宅
相更愧前途豈謂事有幸成計尤私便東
諸侯助竹木之養王錄事寄草堂之貲占
松聲之一丘東臯子北山賦菊花兩岸松聲一丘近桃花之
三洞予此別業與白子西所居相近東墻西壁無補坼之

勞上雨旁風有閉藏之固已與編戶細民
而雜處敢用失侯故相而自名因之挫銳
以解紛且以安常而處順老益濁酒便當
接田父之歡春韭晚菘尚媿奪園夫之利
彼扶搖直上擊水三千韋杜城南去天尺
五坐廟堂佐天子蓋有命焉使鄉里稱善
人斯亦足矣

附金詩紀事案中云左曹之斗食未遷

時裕之尚官左司都事其後梁王監國始
遷左右司員外郎也東道之戈船已御時
天興元年春元兵已駐鄭州海灘寺進攻
汴京也圍城數月外援莫至奴申乞和訛
可出質請罷攻而不得議親捍而大奔車
駕蒙塵輿情無主衆欲推立荆王守純以
城降元如春秋紀季入齊之義所謂人望
荆兄之通好義均紀季之附庸也其時裕

之實請於奴申與阿不欲立監國以全兩宮與皇族翌日而乃有崔立之變二相被殺故有上書宰相喋血京師存趙有謀哭秦無淚之歎也至云劫太學之名流文鄭人之逆節似乎當時禪文仍出劉京叔手苟如史所云好問意未愜乃自爲之則安得復云蜀家降欵具存李昊之世修趙王禪文何預陸機之手迹耶慨受賞者有人

悲嫁名爲無罪乍返追韓之騎已關射羿之弓其言隱痛必有所指注中所云造謗二三者俟更考之

附金詩紀事案注中所云中令君蓋耶律楚材也楚材爲右丞文獻公履之第三子仕元爲中書令裕之獻書卽在癸巳歲之四月於金爲天興二年於元爲太宗之五年時汴京變後南中大夫士歸河朔者所

全金言卷六十五
三
在有之故裕之寓書楚材請以一寺觀費
養天下名士也書中所枚舉者自耆舊如
馮內翰叔獻梁都運斗南高戶部唐卿王
延州從之四人外時輩爲平陽王狀元綱
東明王狀元鶚濱人王賁臨淄人李浩秦
人張徽楊煥然李庭訓河中李獻卿武安
樂夔固安李天翼沛縣劉汝翼齊人謝良
弼鄭人呂大鵬山西魏璠澤人李恒簡李

禹翼燕人張聖俞太原張緯李謙冀致君
張耀卿高鳴孟津李蔚真定李冶相人胡
德珪易州敬鉉雲中李微中山楊果東平
李彥西華徐世隆濟陽張輔之燕人曹居
一王鑄渾源劉祁及其弟郁李仝平定賈
庭揚楊恕濟南杜仁傑洛水張仲經虞鄉
麻革東明商挺漁陽趙著平陽趙維道汝
南楊鴻河中張肅河朔勾龍瀛東勝程思

溫及其從弟思忠共四十九人內劉麻二
人之名皆在焉然則所云造謗二三得毋
卽指之耶但裕之與信之素厚內鄉隱居
河汾投老始終未嘗有閒京叔父子兄弟
其始亦極爲裕之所推許卽晚歲輯中州
集時論次雲卿蓬門先生集中詩尚云二
子祁郁俱有名於時未聞有所譏貶如文
中養虺成蛇蝮弓射羿何甚也然猶稱之

曰名流不深斥其人也諉之曰刼明其非
得已也復爲之解曰命由威制則又似乎
京叔之撰文翟奕張信之輩實使裕之促
之者更爲之解曰佞豈願爲又似乎京叔
屬草既定之後裕之亦嘗畧爲刪改者後
乃盡舉其過歸之一人是以悼同聲同氣
之間有無罪無辜之謗也

附陵川集郝經辨磨甘露碑云國賊反城

自爲功萬段不足仍推崇勒文誦德召學
士滹南先生副一死林希更不顧名節兄
爲起草弟親刻省前便磨甘露碑書丹卽
用宰相血百年涵養一塗地父老來看闍
流涕數樽黃封幾斛米賣却家聲都不計
盜據中國責金源吠堯極口無醜顏作詩
爲告曹聽翁且莫獨罪元遺山

附金詩紀事按遺山集內翰王公墓表云

天興初冬十二月車駕東狩明年春正月
京城西面元帥崔立劫殺宰相送欵行營
群小獻諂請爲立建功德碑以都堂命名
公爲文喋血之際翟奕輩恃勢作威頤指
如意人或少忤則橫遭讒構立見屠滅公
自分必死私謂好問言今召我作碑不從
則死作之則名節掃地貽笑將來不若死
之爲愈也雖然我姑以理論之乃謂奕輩

言丞相功德碑當指何事爲言奕輩怒曰
丞相以京城降城中人百萬皆有生路非
功德乎公又言學士代王言功德碑謂之
代王言可乎且丞相旣以城降則朝官皆
出丞相之門自古豈有門下人爲主帥誦
功德而爲後人所信者問答之次辭情閒
暇奕輩不能奪竟脅太學生託以京城父
老意而爲之則碑文之出於劉京叔手可

知伯常詩中勒文誦德名學士淳南先生
副一死謂王從之能顧名節也林希更不
顧名節兄爲起草弟親刻豈於時京叔撰
文其弟文季亦在圍城中便爲之上石耶
書丹卽用宰相血傷奴申阿不之見殺也
父老來看閭流涕明非京城父老意也數
罇黃封幾斛米卽遺山上梁文中所云受
賞也賣却家聲都不計當以二劉之高祖

全金詩卷六十一
五
南山翁攜從曾祖西巖老人汲父御史從
益於金源氏百年以來世爲高門今乃以
此墮其家聲爲可惜也但林希二字殊不
可解或以麻字之減文爲林信之自號貽
溪復以貽溪之反語爲希耶信之爲秉彝
之孫亦有家聲但與詩所云兄弟者不合
或卽爲信之語以起草讓京叔而以刻石
自任耶末云作詩爲告曹聽翁且莫獨罪

元遺山則所以爲裕之訟寃者雖切然亦
未嘗謂不與其事者蓋裕之之自尚書省
掾左右司員外郎實爲崔立所署其受謗
亦未爲無因也

乙未正月九日立春

十度新正九處家今年癡坐轉堪嗟一冬殘雪不

肯盡連日苦陰

一作寒

殊未涯重碧總誇燕市酒小

紅誰記上林花殘魂零落今無幾乞與春風惱鬢

華

甲午除夜詩云甲子兩周今日盡空將衰淚灑吳天是時金已亡故也

三仙祠

三仙祠下往來頻顛顛征衫滿路塵簫鼓未休寒食酒樵蘇時見舊都人吹殘芳樹紅仍在展放

一作

破

平田綠已勻西北并州隔千里幾時還我故鄉

春

送輔之仲庸還大梁

驂騑爭道渺翩翩誰遣風塵失壯年四壁舊聞懸

磬宅一囊今有賣書錢淋浪

一作瀉

別酒青燈夜滅

沒孤帆落照邊想得還家過春半故都

一作山

喬木

滿蒼煙

眼中

眼中時事益紛然擁被寒窓夜不眠骨肉他鄉各異縣衣冠今日是何年枯槐聚蟻無多地秋水鳴蛙自一天何處青山隔塵土一菴吾欲送華顛

寄欽止李兄

征車南北轉秋蓬關塞相望兩禿翁
衮衮便當隨世路悠悠難復倚天公
銅駝荆棘千年後金馬衣冠一夢中
樽酒雲州古城下幾時攜手哭春風

鎮州與文學百一飲

翁仲遺墟草棘秋蒼龍雙闕記神州
只知終老歸唐土忽漫相逢一作是楚囚
日月盡隨天北轉古今誰見海西流
眼中二老風流在一醉從教萬事休

衛州感事二首

神龍失水困蜉蝣一舸倉皇入宋州
紫氣已沈牛斗夜白雲空望帝鄉
秋劫前寶地三千界夢裏瓊枝十二樓
欲就長河問遺事悠悠東注不還流
白堦亭亭古佛祠往年曾此走京師
不知江令還家日何似湘纍去國時
離合興亡遽如此凄遲零落竟安之
太行千里青如染落日一作獨凭闌干有所思

望崧少二首

崧少飛來崑閬山山家茅屋翠微閒雞豚鄉社相
勞苦花木禪房時往還結習尚餘三宿戀殘年多
負半生閒長河一葦人千里望斷西城碧玉環

飲鶴池邊萬木稠養龍崖上五峰秋藤垂絕壁雲
添潤澗落哀湍雪共流田父占年驚玉旆詩仙留
迹歎崑丘西風落日山陽道空對紅塵憶舊遊

池在緱山養龍
崖在五乳峰下

飲鶴

懷州子城晚望少室

河外青山展卧屏并州孤客倚高城十年舊隱拋
何處一片傷心畫不成谷口莫雲知鄭重林梢殘
照故分明洛陽見說兵猶滿半夜悲歌意未平

羊腸坂

浩蕩雲山直北看凌兢羸馬不勝鞍老來行路先
愁遠貧裏辭家更覺難衣上風沙歎顛顛夢中燈
火憶團圞憑誰爲報東州信今在羊腸百八盤

太原

夢裏鄉關春復秋眼明今得見并州古來全晉非
無策亂後清汾空自流南渡衣冠幾人在西山薇
蕨此生休十年弄筆文昌府爭信中朝有楚囚

野谷道中懷昭禪師

行行汾沁欲分疆漸喜人聲挾兩鄉野谷青山空
自繞金城白堦已相望湯翻豆餅銀絲滑油點茶
心雪蕊香說向阿師應被笑人生生處果難忘

外家南寺

在至孝社予兒時讀書處也

鬱鬱楸梧動晚煙一庭風露覺秋偏眼中高岸移
深谷愁裏殘陽更亂蟬去國衣冠有今日外家梨
栗記當年白頭來往人間徧依舊僧窓借榻眠

寄楊飛卿

客夢悠悠信轉蓬藜牀殷殷動晨鐘西風白髮三
千丈故國青山一萬重沙水有情留過鴈乾坤多
事泣秋蟲三閒老屋知何處慚媿雲間陸士龍

再到新衛

蝗旱相仍歲已荒，伶俜十口值還鄉。
空令姓字喧時輩，不救饑寒趨路傍。
行帳馬嘶塵瀕洞，空邨人去雨淋浪。
河平千里筋骸盡，更欲驅車上太行。

別冠氏諸人

戊辰秋八月初二日

東舍茶渾酒味新，西城紅豔杏園春。
衣冠會集今爲盛，里社追隨分更新。
分手共傷千里別，低眉常媿六年貧。
他時細數平原客，看到還鄉第幾人。

四哀詩

李欽叔

赤縣神州坐陸沈，金湯非粟禍侵尋。
當官避事平生恥，視死如歸社稷心。
文采是人知子重，交朋無我與君深。
悲來不待山陽笛，一憶同衾淚滿襟。

冀京父

先公藻鑑識終童，曾拔崑山玉一峯。
不見連城沽白璧，早聞烈火燎黃琮。
重圍急變紛紛口，九地忠

魂耿耿胸欲弔南雲無覓處士林能不泣相逢

李長源

冀都事死東州禍李翰林亡陝府兵方爲騷人箋
楚些更禁書客墮秦坑石苞本不容孫楚黃祖安
能貸禰衡同甲四人三橫實此身雖在亦堪驚

王仲澤

太學聲華弱冠馳青雲岐路九霄飛上前論事龍
顏喜幕下籌邊犬吠稀壯志相如頭碎柱赤心嵇

紹血沾衣從來聖牘褒忠義誰謂幽魂一發揮

杏花

庚子歲
南菴賦

芳樹春融絳蠟凝春風寂寞掩柴荆畫眉盧女嬌
無奈齟齬孫娘笑不成已怕宿妝添蝶粉更堪暖
蕊鬧蜂聲一般疎影黃昏月獨愛寒梅恐未平

賦南中楊生玉泉墨

墨不用松煙
而用燈煤

萬竈玄珠一唾輕客卿新以玉泉名御團更覺香
爲累冷劑休誇漆點成澹袖秦郎無籍在畫眉張

遇可憐生晴窓弄筆人今老孤負松風入硯聲宮中

以張遇麝香小團為畫眉墨

赤石

林罅陰崖霧杳冥石根寒溜玉玎玲雲來朔漠疑
秋早山近清涼覺地靈靜愛鳥聲存野調鬧嫌人
迹帶塵腥南臺說有金銀氣可是并汾處士星

山僧徒謂之小五臺九月中時有景星如佛光云

灑亭同麻知幾賦

零落棲遲復此遊一樽聊得散羈愁天圍平野莽
無際水繞孤城閒不流元是深字知幾請予改作閒字柳意漸迴
淮浦暖鴈聲仍帶塞門秋登高遠望令人起欲買
煙波無釣舟

過應州

平野風埃接戍樓邊城三月似窮秋人生土屋纜
容膝驛路旃車不斷頭隨俗未甘嘗馬湏敵寒直
欲御羊裘十年紫禁煙花繞此日雲山是應州

感事

富貴何曾潤髑髏直須浙米向矛頭血讐此日逢
三怨風鑑生平備九流瓢飲不甘顏巷樂市鉗真
有楚人憂世閒安得如川酒力士鎗頭醉毛休

感興

夜宿讀
書山作

倚梯從昔望煙霄七葉何人竟珥貂道路常教車
歷鹿功名唯有鬢飄蕭勤如韓子初無補晚似馮
公豈見招五十二年等閒裏一窓風葉雨蕭蕭

御訂全金詩增補中州集卷六十六

金元好問原本

元好問四

出都二首

漢宮曾動伯鸞歌事去英雄可奈何但見觚稜上
金爵豈知荆棘臥銅駝神仙不到秋風客富貴空

悲春夢婆行過盧溝重回首鳳城平日五雲多
歷歷興亡敗局棋登臨疑夢復疑非斷霞落日天
無盡老樹遺臺秋更悲滄海忽驚龍穴露廣寒猶
想鳳笙歸從教盡剗瓊華了留在西山儘淚垂
壽寧
宮有瓊華島絕頂廣寒
殿近爲黃冠輩所撤

甲辰三月旦日以後雜詩二首

澌澌猩紅鬧曉晴攢頭真似與春爭舒開楊柳聊
相映瘦殺寒梅枉自清粉豔低回工作態絳脣寂

寞獨含情畫圖只愛殘妝好未信徐郎解寫生
密霧輕塵細灑勻綠雲紅雪一番新風光爛熳供
歡席酒味清醇似主人落落湖山如有喜欣欣魚
鳥亦相親新詩寫入奚奴錦從此他鄉不算春

紫牡丹

夢裏華胥失玉京小闌春事自昇平只緣造物偏
留意須信凡花浪得名蜀錦浪淘添色重御爐風
細覺香清金刀一翦腸堪斷綠鬢劉郎半白生

洛陽

千年河嶽控喉襟一日神州見陸沈已爲操琴感
衰涕更須同輦夢秋衾城頭大匠論蒸土地底中
郎待摸金擬就天公問翻復蒿萊丹碧果何心

爲鄧人作詩

再見州人本不期相留相挽忍相違攜盤渭水空
一作流涕種柳金陵已合圍事去恍疑春夢過眼
堪明還似故鄉歸題詩未要題名字今是中原一布

衣

贈張主簿偉

江岸墳荒草棘秋朱陽南下重君憂弓刀近塞人
煙少林壑經霜虎迹稠究竟畏途知有漸激昂高
義報無繇從今弟姝通家了莫向瓜田認故侯
爲戒究竟伴能過險惡道

寄劉繼先

清霜茅屋耿無眠坐憶分攜一概然楚客登臨動

歸興謝公哀樂感中年淒涼古驛人煙外迤邐荒
山雪意邊千樹春風水楊柳待君同繫晉溪船

寄答商孟卿

窈渺朱絃寂寞心得詩何啻得黃金冷猿掛夢山
月暝老鴈叫羣江渚深異縣五年仍隔闊荒城連
日想登臨書來且只平安了撥觸離愁恐不禁

十一月五日暫往西張

城隈細路入沙汀絮帽衝風日再經歲歎村墟更

荒惡窮冬人影亦伶俚林煙漠漠鴉邊暗山骨稜
稜雪外青四十年來此寒苦凍吟猶記隴關亭

石嶺關書所見

軋軋旃車轉石槽故關猶復戍弓刀連營突騎紅
塵暗微服行人細路高已化蟲沙休自歎厭逢豺
虎欲安逃青雲玉立三千丈元只東山意氣豪

汴梁除夜

追錄

六街歌鼓待晨鐘四壁寒齋只病翁鬢雪得年應

更白燈花何喜也能紅養生有論人空老祖道無
詩鬼亦窮數上聲日西園看車馬一番桃李又春風

龍興寺閣

全趙堂堂入望寬九層飛觀儘高寒空聞赤幟疑
軍壘真見金人泣露槃桑海幾經塵劫壞江山獨
恨酒腸乾詩家總道登臨好試就遺臺老樹看

聽姨女喬夫人鼓風入松

白雪朱絃一再行春風纖指十三星雲窓霧閣有

今夕寶靨羅裙無此聲瀟灑寒松度虛籟悠揚飛
絮攪青冥胎仙不比湘靈瑟五字錢郎莫漫驚

寒食

壬子清
明後作

上苑春風盛物華天津雲錦赤城霞輕舟矮馬追
隨遠翠幕青旗笑語譁化國樓臺隔瀛海吳兒洲
渚記仙家山齋此日腸堪斷寂寞銅瓶對杏花

送樊順之

弓刀十驛岳蓮州渭水秦山得意秋王粲從軍正

年少庾郎入幕更風流寒鄉况味真雞肋清鏡功名屬虎頭寄謝溪風亭上月老夫乘興欲西游

過寂通菴別陳丈

并序

陳丈未識某而愛其詩曾對高御史士美言我他日見遺山當快飲百醉後見之而公已病乃相約易百醉爲百杯每見以酒籌計之至七八十杯復有此別故詩中及之

甲辰秋

心遠繇來地自偏不離城市得林泉從教上界多

官府且放閒身作地仙三月有期何敢負百杯未滿會須填違離更覺從公晚却望都門一慨然

大明贈答張簡之

營平豪宕變溫文所見今知勝所聞只道生涯無長物爭教詩壘策奇勲伐薪未敢煩名士載酒能來過子雲後日山陽養衰疾藥籠仙品正須君

存沒

辛老敬之
劉兄景玄

行閒楊趙提衡早老去辛劉入夢頻案上酒杯聊

自慰袖中詩卷欲誰親
兩都秋色皆喬木
一代名家不數人
汲冢遺編要完補
可能虛負百年身

人日有懷愚齋張兄緯文

書來聊得慰懷思
清鏡平明見白髭
明月高樓燕市酒
梅花人日草堂詩
風光流轉何多態
兒女青紅又一時
澗底孤松二千尺
殷勤留看歲寒枝

張村杏花

丁巳三月初二日

昨日櫻桃

一作唇

絳蠟痕今朝紅袖已迎門
只應芳

樹知人意留著殘妝伴
酒罇濃李尚須羞粉豔
寒梅空自怨黃昏
詩家元白無今古
從此張村卽趙村

送奉先從軍

潦倒書生百戰場
功名都屬繡衣郎
虎頭食肉無不可
鼠目求官空自忙
卷月清笳渭城曉
倚天長劍蜀山蒼
習池老去風流減
醉後揚鞭媿葛疆

贈玉峯魏文邦彥

金詩卷六十六
七
夢想南山掩靄間，眼明驚見玉峯寒。
風波舊憶橫身過，世事今歸袖手看。
販婦庸兒識名姓，故鄉遺族見衣冠。
臨流卜築平生事，會就遼東管幼安。

鬱鬱

鬱鬱羈懷不易開，更堪寥落動淒哀。
華胥夢破青山在，梁甫吟成白髮催。
秋意漸隨林影薄，曉寒都逐鴈聲來。
并州舊日風聲惡，悵望鄉書早晚回。

秋日載酒光武廟

美酒良辰邂逅同，赤眉城北漢王宮。
百年星斗歸天上，萬古旌旗在眼中。
草木暗隨秋氣老，河山長爲昔人雄。
一杯逕醉風雲地，莫放銀盤上海東。

丙辰九月二十六日挈家遊龍泉

風色澄鮮稱野情，居僧聞客喜相迎。
藤垂石磴雲添潤，泉漱山根玉有聲。
庭樹老於臨濟寺，霜林渾是漢家營。
明年此日知何處，莫惜題詩記姓名。

洛陽高少府灑陽後菴四首

溪上弄明月風露發新警心空無一塵萬竹掃清影

一水隨人意蔬畦復芋溝風波河洛近莫放出山流

韭早春先綠菘肥秋未黃殷勤繞畦水終日爲君忙

地僻境逾靜林疎秋已分清溪一片月修竹四山雲

山居雜詩六首

瘦竹藤斜挂叢

一作幽

花草亂生林高風有態苔滑

水無聲

石潤雲先動橋平水漸過野陰添晚重山意向秋多

樹合秋聲滿村荒莫景閒虹收仍白雨雲動忽青山

川迴楓林散山深竹港幽疎煙沈去鳥落日送歸

牛

漲落沙痕出堤摧岸口斜斷橋堆聚沫高樹閣浮

槎

鷺影兼秋靜蟬聲帶晚涼陂長留積水川闊盡斜

陽

梁父吟扇頭

孔明箕踞坐大石上望月作梁父吟

盤礴萬古心塊石入危坐青天一明月孤唱誰與

和

辛亥寒食

寒食年年好今年迥不同秋千與花影并在月明

中

德和墨竹扇頭

靜裏離離新粉動時細細清香明月清風自在紅

塵白日何妨

嫩香新粉墨離離李長吉竹詩

曹得一扇頭

機中秦女仙去月底梅花晚開只見一枝疎影不

知何處香來

論詩三十首

丁丑歲
三鄉作

漢謠魏什久紛紜正體無人與細論誰是詩中疏
鑿手暫教涇渭各清渾

曹劉坐嘯虎生風四海無人角兩雄可惜并州劉
越石不教橫槊建安中

鄴下風流在晉多壯懷猶見缺壺歌風雲若恨張

華少溫李新聲奈爾何

鍾嶸評張華詩恨其
兒女情多風雲氣少

一語天然萬古新豪華落盡見真淳南窓白日羲

黃上未害淵明是晉人

柳子厚唐之謝靈運
陶淵明晉之白樂天

縱橫詩筆見高情何物能澆魂磊平老阮不狂誰
會得出門一笑大江橫

心畫心聲總失真文章寧復見爲人高情千古關
居賦爭信安仁拜路塵

慷慨歌謠絕不傳穹廬一曲本天然中州萬古英
雄氣也到陰山勅勒川

沈宋橫馳翰墨場風流初不廢齊梁論功若準平
吳例合著黃金鑄子昂

鬪靡誇多費覽觀陸文猶恨冗於潘心聲只要傳

心了布穀瀾翻可是難

陸蕪而潘靜語見世說

排比鋪張特一途藩籬如此亦區區少陵自有連

城壁爭奈微之識玳珎

事見元稹子美墓志

眼處心生句自神暗中摸索總非真畫圖臨出秦

川景親到長安有幾人

望帝春心託杜鵑佳人錦瑟怨華年詩家總愛西
崑好獨恨無人作鄭箋

萬古文章有坦途縱橫誰似玉川盧真書不入今
人眼而輩從教鬼畫符

出處殊塗聽所安山林何得賤衣冠華歆一擲金
隨重大是渠儂被眼謾

筆底銀河落九天何曾顛顛飯山前世間東抹西
塗手枉著書生待魯連

切切秋蟲萬古情
燈前山鬼淚縱橫
鑑湖春好無人賦
夾岸桃花錦浪生

切響浮聲發巧深
研磨雖苦果何心
浪翁水樂無宮徵
自是雲山韶濩音

水樂次山事又其欵乃曲云停橈靜聽曲中意好是

雲山韶濩音

東野窮愁死不休
高天厚地一詩囚
江山萬古潮陽筆
合在元龍百尺樓

萬古幽人在澗阿
百年孤憤竟如何
無人說與天

隨子春草輸羸校幾多

天隨子詩無多藥草在南榮合有新苗次第生穉子

不知名品上恐隨春草鬪輸羸

謝客風容映古今
發源誰似柳州深
朱絃一拂遺音在
却是當年寂寞心

窘步相仍死不前
唱酬無復見前賢
縱橫正有凌雲筆
俯仰隨人亦可憐

奇外無奇更出奇
一波纔動萬波隨
只知詩到蘇黃盡
滄海橫流却是誰

曲學虛荒小說欺俳諧怒罵豈宜時今人合笑古
人拙除却雅言都不知

有情芍藥含春淚無力薔薇臥晚枝拈出退之山

石句始知渠是女郎詩

此首論本
王中立

亂後玄都失故基看花詩在只堪悲劉郎也是人
閒客枉向春風怨兔葵

金入洪鑪不厭頻精真那計受纖塵蘇門果有忠
臣在官放坡詩百態新

百年纔覺古風迴元祐諸人次第來諱學金陵猶
有說竟將何罪廢歐梅

古雅難將子美親精純全失義山真論詩寧下涪
翁拜未作江西社裏人

池塘春草謝家春萬古千秋五字新傳語閉門陳
正字可憐無補費精神

撼樹蚍蜉自覺狂書生技癢愛論量老來留得詩
千首却被何人較短長

西園

百草千花雨氣新今朝陌上有游塵
皇州春色濃於酒醉殺西園歌舞人

杏花雜詩八首

杏花牆外一枝橫半面宮妝出曉晴
看盡春風不回首寶兒元自太憨生

露華浥浥汎晴光睡足東風倚綠窓
試遣紅妝映銀燭湘桃爭合伴仙郎

嫋嫋纖條映酒船綠嬌紅小不勝憐
長年自笑情緣在猶要春風慰眼前

暖日園林可散愁每逢花處儘遲留
青旗知是誰家酒一片春風出樹頭

紛紛紅紫不勝稠爭得春光競出頭
却是梨花高一著隨宜梳洗儘風流

露浥清華粉自添隔溪遙見玉簾
苦眼看桃李飄零盡更揀繁枝插帽簷

楚客離魂不易招野春平碧水迢迢垂楊也被多情惱瘦損春風十萬條

紅妝翠蓋惜風流春動香生不自繇莫向芸齋厭閒冷小詩供作錦纏頭

韓偓燕三清之瑞露春動七情咀五色之靈芝香生

九竅

出京

巫峽歸雲底處尋高城渺渺莫煙沈春風不翦垂楊斷繫盡行人北望心

惠崇蘆鴈

寒沙折葦靜相依故國春風早晚歸意外羈棲誰畫得羽毛單薄稻梁微

銅雀臺瓦硯

愛惜鉛華洗又看畫闌桂樹雨聲寒千年不作鴛鴦去喚得書生笑老瞞

步虛詞三首 後二首三鄉時作

閬苑仙人白錦袍海山宮闕醉蟠桃三更月底鸞

聲急萬里風頭鶴背高

萬神朝罷出通明和氣歡聲滿玉京見說人間有新異綠章封事謝昇平

琪樹明霞碧落宮歌音嫋嫋度冷風人間聽得霓裳慣猶恐鈞天是夢中

風雨停舟圖

老木高風作意狂青山和雨入微茫畫圖喚起扁舟夢一夜江聲撼客牀

楊柳

楊柳青青溝水流鶯兒調舌弄嬌柔桃花記得題詩客斜倚春風笑不休

梁縣道中

青山簇簇樹重重人在春雲浩蕩中也是杏花無意况一枝臨水臥殘紅

長壽山居元夕

微茫燈火共荒村黃葉漫山雪擁門三十九年何

限事只留孤影伴黃昏

右司正之家渭川千畝圖

官街塵土霧中天入眼荒寒一灑然大似終南山
下看北風和雪卷蒼煙

山居二首

斜陽高樹挂晴虹肅肅微涼雨氣中一道鷺鷥花
不斷密香吹滿馬頭風

詩腸搜苦怯茶甌信手拈書却枕頭簷溜滴殘山

院靜碧花紅穗媚涼秋

寄女巖

鸛崖魚窟路閒關旬月無絲一往還寒食歸寧見

隣女舉家回首望西山

鸛崖魚窟在內
鄉往盧氏道中

自鄧州幕府暫歸秋林

升斗微官不療饑中林春雨蕨芽肥歸來應被青
山笑可惜緇塵染素衣

題省掾劉德潤家驂鸞圖并爲同舍郎劉長

全金言卷六十六
卿記異劉在方城先有碧簫之遇如芙蓉城
事云
千劫情緣萬古期樓中蕭史姓名非洞天花落秋
雲冷腸斷青鸞獨自飛

雜著三首

青蓋朝來帝座新豈知衛瓘是忠臣洛陽荆棘千
年後愁絕銅駝陌上人

天上河源地上流黃金浮世等閒休埋愁不著重

泉底儘向人閒種白頭

半紙虛名百戰身轉頭高塚臥麒麟山閒曾見漁
樵說辛苦凌煙閣上人

俳體雪香亭雜詠十二首

亭在故汴宮
仁安殿西

洛陽城闕變灰煙莫號朝虞只眼前爲向杏梁雙
燕道營巢何處過明年

落日青山一片愁大河東注不還流若爲長得熙
春在時上高層望宋州

醇和旁近洞房環碧瓦參差竹樹一作木閒批奏內

人輪上直去年名姓在窓閒

醇和殿名

天上三郎玉不如手中白羽雨趁花奴御屏零落宣

和筆留得華清按樂圖

詩仙詩鬼不謾欺時事先教夢裏知禁苑又經人

物散荒涼臺榭水流遲

十年前商帥國器方城夢中得後二句為言如此

金縷歌詞金曲卮百年人事鬢成絲重來未必春

風在更為梨花住少時

楊柳隨風散綠絲桃花臨水弄妍姿無端種下青

青竹恰到湘君淚盡時

琵琶心事曲中論曾笑明妃負漢恩明日天山山

下路不須回首望都門

鑪薰浥浥帶輕陰翠竹高梧水殿深去去旃車雪

三尺畫羅休縷麝香金

附 秣林伐山宋徽宗宮人多以麝香色為

縷金羅為衣裙元裕之詩北去穹廬千萬

里畫羅休縷麝香金

苦才多思是春風偏近騷人悵望中
曉盡杜鵑枝上血海棠明日更應紅

暖日晴雲錦樹新風吹雨打旋成
塵宮園深閉無人到自在流鶯哭莫春

莫雲樓閣古今情地老天荒恨未平
白髮纍臣幾人在就中愁殺庾蘭成

附金詩紀事案遺山集中雪香亭雜詠共

一十五首乃金亡之後重過汴宮而作
黍離之感觸目興懷白髮纍臣自傷故國
非爲隔代咏也楊用修以爲宋徽宗事其亦
昧於詩意矣

記夢

天上材官老不材從教兀兀走塵埃
夢中望拜通明殿曾見金書兩字來

戊子七月二十四日內鄉往盧氏宿走馬平夜夢拜天帝像遂觀法駕導引畫幄最前負弩三人中有金書小學題裕之者夢中不自知其爲予也

雜著二首

六朝瓊樹掌中春回首嚴妝一面新生羨石家金
谷裏千年獨有墜樓人

燕語鶯啼百轉新長廊寂寂不逢人東君去作誰
家客花柳無情各自春

睂

石綠香煤淺淡閒多情長帶楚梅酸小詩擬寫春
愁樣憶著分明下筆難

出都

春閨斜月曉聞鶯信馬都門半醉醒官柳青青莫
回首短長亭是斷腸亭

姨母隴西君諱日作

寶鏡煌煌照九州埋藏曾及見諸劉鄴城今日無

雷煥紫氣誰當辨斗牛

陽曲劉氏家大寶鏡能照
天地四方以前知休咎其

家埋地中人不得見也明昌泰和中北方兵動渠
父子欲卜之一日先以旃幕障中庭乃扃閉門戶
甚嚴及掘鏡出光耀爛然一室盡明如初日之照
鏡中見北來兵騎穰穰無數餘三方都無所覩因

大駭曰不可不可卽埋之姨母時伏牀下得竊窺焉兵火後此家惟一兒子在姨母能指鏡處存否則不知也故予詩及之

自趙莊歸冠氏

杏園紅過雪披離楊柳無風綠綫齊寒食人家在原野乳鴉牆外盡情啼

濟南雜詩五首

兒時曾過濟南城暗算存亡只自驚四十二年彈指過却疑行處是前生

吳兒洲渚似神仙菴畫溪光碧玉泉別有洞天君不見鵲山寒食泰和年

石刻燒殘讌集辭雄樓傑觀想當時只應畫戟清香地多欠韋郎五字詩

白煙銷盡凍雲凝山月飛來夜氣澄且向波閒看玉堦不須橋畔覓金繩

荷葉荷花爛熳秋鷺鷥飛近釣魚舟北城佳處經行徧留著南山更一遊

附元好問濟南行記予兒時從先隴城府君官掖縣嘗過濟南然但能憶其大城府而已長大來聞人談此州風物之美遊觀之富每以不得一遊爲恨歲乙未秋七月予來河朔者三年矣始以故人李君輔之之故而得一至焉因次第二十日閒所遊歷爲行記一篇傳之好事者初至濟河約杜仲梁俱東並道諸山南與太山卽是日

以陰晦不克見至濟南輔之與同官權國器置酒歷下亭故基此亭在府宅之後自周齊以來有之旁近有亭曰環波鵲山北渚嵐漪水香水西疑波狎鷗臺與橋同日百花芙蓉堂曰靜花軒曰名士水西亭之下湖曰大明其源出於舜泉其大占城府三之一秋荷方盛紅綠如繡令人渺然有吳兒洲渚之想大槩承平時濟南樓觀天

全金詩卷六十六
下莫與爲比喪亂二十年唯有荆榛瓦礫
而已正如南都隆德故宮頽圯百年澗谿
草樹有荒寒古澹之趣雖高薨畫棟無復
其舊而天巧具在不待外飾而後奇也凡
北渚亭所見西北孤峯五日匡山濟河路
出其下世傳李白嘗讀書於此曰粟山曰
藥山以陽起石得名曰鵲山山之民有云
每歲七八月烏鵲集其上亦有一山皆曰

鵲時此山之所以得名歟曰華不注太白
詩云昔歲遊歷下登華不注峯茲山何峻
秀青翠如芙蓉此真華峯寫照詩也大明
湖由北水門出與濟水合瀰漫無際遙望
此山如在水中蓋歷下城絕勝之處也華
峯之東有臥牛山正東百五十里鄒平之
南有長白山范文正公學舍在焉故又謂
之黌堂嶺東十里有南北兩妙山兩山之

閒有閔子騫墓西南大佛頭嶺下有寺千
佛山之西有函山長二十里所山有九十
谷泰山之北麓也泰山去城百里而近特
爲函山所礙天晴登北渚則隱隱見之歷
山去城四五里許山有碑云其山修廣出
材不匱今但蕩然一丘耳西南少斷有蠟
山由南山而東則連亘千里與海山通矣
瀑流泉在城之西南泉灤水源也山水匯

於渴馬崖湫而不流近城出而爲此泉好
事者曾以穀糠驗之信然往時漫流纔沒
脛故泉上湧高三尺許今漫流爲草木所
壅深及尋丈故泉出水面纔二三寸而已
近世有太守改泉名檻泉又立檻泉坊取
詩義而言然土人呼瀑流如故瀑流字又
作趵突曾南豐云然金線泉有紋若金線
夷猶池面泉今爲靈泉菴道士高生妙琴

事人目爲琴高留予宿者再進士解飛卿
好賢樂善歎曲周密從予游者凡十許日
說少日曾見所謂金線者尚書安文國寶
亦云以竹竿約水使不流尚或見之予與
解徘徊泉上者三四日然竟不見也杜康
泉今湮沒土人能投其處泉在舜祠廡下
云杜康曾以此泉釀酒有取江中泠水與
之較者中泠每升重二十四銖此泉減中

泠一銖以之瀹茗不減陸羽所第諸水云
舜井二有歐公詩大字石刻甘露園紀歷
下泉云夫濟遠矣初出河東王屋曰沅水
注秦澤潛行地中復出共山始曰濟故禹
書曰道沅水東之逾温逾墳城入於河益
於滎泆於曹濮之門乃出於陶丘北會於
汶過歷下灤水之北遂東流且濟之爲瀆
與江淮河等大而均尊獨濟水所行道障

於太行限於大河終能獨達於海不然則無以謂之瀆矣江淮河行地上水性之常者也濟或洑於地中水性之變者也予愛其論水之變與常有當於予心者故并錄之珍珠泉今爲張舍人園亭二十年前吾希顏兄嘗有詩至泉上則知詩爲工矣凡濟南名泉七十有二爆流爲上金線次之珍珠又次之若玉環金虎黑虎柳絮皇華

無憂洗鉢及水晶簞非不佳然亦不能與三泉侔矣此遊至爆流者六七宿靈泉菴者三汎大明湖者再遂東入水柵柵之水名繡江發源長白山下周圍三四十里府參佐張子鈞張飛卿觴予繡江亭漾舟荷花中十餘里樂府皆京國之舊劇談豪飲抵莫乃罷留五日而還道出王舍人莊道旁一石刻云隋開皇丙午十二月鈔珍墓

誌珍巴郡武昌人學通三家優游田里以
壽卒誌文鄙陋字以巴爲巴蓋周隋以來
俗書傳習之弊其云葬岫山之西者知西
南小丘爲岫山也以歲計之隋開皇六年
丙午至今甲午碑石出壙中蓋十周天餘
一大衍數也道南有仁宗時侍從龍圖張
侍郎揆讀書堂三字東坡所書并范純粹
律詩俱有石刻揆字叔文自題仕宦之後

每以王事至其家則必會鄉隣甥姪盡醉
極歡而罷各以歲月爲識叔文有文譽仕
亦達然以榮利之故終身至其家三而已
名宦之役人如此可爲一嘆也至濟南又
留二日汎大明待杜子不至明日行濟河
道中小雨後泰山峯嶺歷歷可數兩旁小
山閒見層出雲煙出沒顧揖不暇恨無佳
句爲摹寫之耳前後所得詩凡十五首并

諸公唱醜附於左

題劉才卿湖石扇頭

幽澗雲凝雨未乾
曲池疎竹共荒寒
扇頭喚起西園夢
好似熙春閣下看

聞歌懷京師舊遊

樓前誰唱綠腰催
千里梁園首重回
記得杜家亭子上
信之欽用共聽來

出鎮州

汾水歸心日夜流
孤雲飛處是松楸
無端行近還鄉路
却傍西山入相州

南關二首

風裏秋蓬不自繇
一生幾度過隆州
無情團栢關前水
流盡朱顏到白頭

路轉川迴失繫舟
更教兩驛過徐溝
多情團栢關

前水却共清汾一處流

是日自徐溝宿南關

馬坊冷大師清真道院

枯蒲折葦障清灣十里風荷指顧閒安得西湖展
江手亂鋪雲錦浸青山

遊天壇雜詩五首

芳樹陰陰鳥語譁綠雲晴雪映紅霞青山可是堪
人恨藏著中巖十里花

漫山白白與紅紅小樹低叢看不供總道楂花香

氣好就中偏愛玉瓏鬆

花名有玉瓏鬆

溪童相對采椿芽指似陽坡說種瓜想得一作是近

山營馬少青林深處有人家

湍聲洶洶落懸崖見說蛟龍擘石開安得天瓢一

翻倒躡雲平下看風雷

時早甚故云

仙壇倒影鳳麟洲一道雲光插素秋也是天公閒
不得海東移著海西頭

初挈家還讀書山雜詩二首

天門筆勢到閒閒相國文章玉筍班從此晉陽方
志上繫舟山是讀書山

繫舟先大父讀書之所閒閒公改爲元子讀書山又

大參楊公叔玉
撰先人墓銘

眼中華屋記生存舊事無人可共論
老樹婆娑沙三百尺青衫還見讀書孫

賦瓶中雜花七首

予絕愛未開杏花故末篇自戲

老眼驚看節物新今年更與酒杯親
東山一道花如繡從此他鄉不是春
香中人道睡香濃誰信丁香臭味同一樹
百枝千萬結更應薰染費春工

生紅點點弄嬌妍半拆花房更可憐
傳語春風好將護莫教容易作銀錢

紅抹蘭膏綠染衣綠嬌紅小兩相宜
華邊剩有清香在木石癡兒自不知

素豔來從月姊家溫風淑氣發清華
人間自有交枝玉天上休開六出花

昨日桃花錦片新兔葵今日到殘春
低枝留得稀疎朶比似全開更惱人

古銅瓶子滿芳枝
裁翦春風入小詩
看看海棠如有語
杏花也到退房時

杜生絕藝

杜生絕藝兩絃彈
穆護沙詞不等閒
莫怪曲終雙淚落
數聲全似古陽關

德華小女五歲能誦予詩數首
以此詩爲贈
牙牙嬌語總堪誇
學念新詩似小茶
好箇通家女

兄弟海棠紅點紫
蘭芽

唐人以茶爲小女美稱

春歸

野杏溪桃三兩枝
春歸也作送春詩
東君自愛長安好
能住山城得幾時

發南樓度鴈門關二首

雞聲未動發南樓
澗水隨人向北流
欲望讀書山遠近
鴈門關上嬾回頭

稜磴石磴倚高梯
穹谷無人綠樹齊
總爲古來征戍苦
宿雲常傍塞垣低

自題中州集後五首

鄴下曹劉氣儘豪江東諸謝韻尤高若從華實評
詩品未便吳儂得錦袍

陶謝風流到百家半山老眼淨無花北人不拾江
西唾未要曾郎借齒牙

萬古騷人嘔肺肝乾坤清氣得來難詩家亦有長
沙帖莫作宣和閣本看

文章得失寸心知千古朱絃屬子期愛一作殺溪

南辛老子相從何止十年遲

平世何曾有稗官亂來史筆亦燒殘百年遺藁天
留在抱向空山掩淚看

講武城

作計千年復萬年似嫌蒸土不能堅祇今講武人
何在衰柳殘楊有亂蟬

藥山道中

西風砧杵日相催著破征衣整未迴白鴈已銜霜

信過青林閒送雨聲來

黃華峪五首

岱崧王屋舊經過自倚胸中勝槩多獨欠太行高
絕處青天白日看山河

絕壁孤雲仔細看雲閒龍穴想高寒碧瀾寸寸橫

秋色空對山靈說到難

唐人到難篇有碧瀾之下寸寸秋色之句見文粹

玉立千峯畫不如天公自有范寬圖間山要著黃

花老千尺珠簾得似無

前輩閭山詩有向使早逢周處士子端應不號黃華

之句處士指周先生德卿

團團石甕琢青瑤仰面看雲覺動搖誰著天瓢灑

飛雨半空翻轉玉龍腰

落峽飛流散不收湍聲洶洶動高秋也應嫌被紅

塵澆才近山門便泐流

鄉郡雜詩二首

予家自五代以後自汝州遷平定宋末又自平定遷於忻

故文字中以平定為鄉郡

一溝流水幾橋橫岸上人家種柳成來歲春風一

千樹綠煙和雨暗重城

新堂縹緲接飛樓雲錦周遭霜樹秋若道使君無
妙思冠山移得近城頭

前高山雜詩

天池一雨洗氛埃全晉堂堂四望開不上朝元峯
北頂真成不到此山來

楚山清曉圖

雨潤烟濃十二峯雲間合有楚王宮遙知別後西

州夢一抹春愁淺淡中

三鄉雜詩二首

夢寐滄洲爛熳遊西風安得釣魚舟薄雲樓閣猶
烘暑細雨林塘已帶秋

尖新秋意晚晴中六尺筇枝滿袖風草合斷橋通
暗綠竹搖殘照漏疎紅

榆社硤口村早發

瘦馬長途懶著鞭客懷牢落五更天幾時不屬雞

聲管睡徹東窓日影偏

同兒輩賦未開海棠二首

翠葉輕籠豆顆勻
臙脂濃抹蠟痕新
殷勤留著花梢露
滴下生紅可惜春

枝閒新綠一重重
小蕾深藏數點紅
愛惜芳心莫輕吐
且教桃李鬧春風

楊祕監馬圖

天閑誰省識真龍
金粟堆前草色空
忽見畫圖疑

是夢東華馳道麝香驄

岳山道中

野禾成穗石田黃
山木無風雨氣涼
流水平岡儘堪畫
數家村落更斜陽

雪岍鳴鶴

離離殘雪點荒叢
更著幽禽慘淡中
笑殺畫簾雙燕子
秋千紅索海棠風

客意

雪屋燈青客枕孤
眼中了了見歸途
山閒兒女應相望
十月初旬得到無

論詩三首

坎井鳴鼃自一天
江山放眼更超然
情知春草池塘句
不到柴煙糞火邊

詩腸搜苦白頭生
故紙塵昏枉乞靈
不信驪珠難得試
看金翅擘滄溟

暈碧裁紅點綴勻
一回拈出一回新
鴛鴦繡了從

教看莫把金針度與人

風柳鳴蟬

輕明雙翼曉風前
一曲哀箏續斷絃
移向別枝誰畫得
只留殘響客愁邊

僧寺阻雨

山氣森岑入葛衣
砧聲偏與客心期
僧窓連夜瀟瀟雨
又較歸程幾日遲

王子文琴齋

全金詩卷六十六
天上秋風月底霜求凰一曲鬢絲長相如四壁消
何物直要文君典鷓鴣

舊與趙景温

浮雲流水易西東回首梁園似夢中一別十年今
又別酒罇能得幾回同

雪谷早行圖

卷中多國朝
名勝題詠

畫到天機古亦難遺山詩境更高寒貞元朝士今
誰在莫厭明窓百過看

夜宿山中

月華人影共徘徊未算歸程夢已回澗水悲鳴易
愁絕長松休送雨聲來

臺山雜詠五首

甲寅六月

西北天低五頂高茫茫松海露靈鼇太行直上猶
千里井底殘山枉叫號

山上離宮魏故基黃金佛閣到今疑異時人讀清
涼傳應記諸孫賦黍離

一國春風帝子家
綠雲晴雪閒紅霞
香繇穩藉僧
鞵草蜀錦驚看佛鉢花

沈沈龍穴貯雲煙
百草千花雨露偏
佛土休將人境比
誰家隨步得金蓮

靈蛇不與世相關
時復蜿蜒水石閒
何處天瓢待霖雨
一龕香火梵仙山

乙卯二月二十一日歸自汴梁二十五日夜
久旱而雨偶記內鄉一詩追錄於此今三十

年矣

桑條沾潤麥溝青
軋軋耕車鬧曉晴
老眼不隨花柳轉
一犁春事最關情

石勒問道圖

輕比韓彭作李陽
高僧久已笑君狂
中原果有劉文叔
肯說鈴聲替戾岡

貞燕

杏梁雙宿復雙飛
海國爭教隻影歸
想得秋風逼

涼冷謝家兒女亦依依

留贈丹陽王鍊師

敝盡貂裘白髮新京華
旅食記前身仙翁相見休
相笑同是邯鄲枕上人

元夕

花影燈光一萬重
青衫驄馬踏東風
彰陽舊事無人記
二十三年似夢中

酴醾

枕幃餘韻最清真
夢裏猶來著莫人
擬借濃陰作羅幕
玉纓多處臥殘春

和德新丈

二年老眼暗兵塵
今日逢君喜事新
結伴還鄉有成約
不應先作北歸人

倦繡圖


香玉春來困不勝
嗁鶯喚夢幾時應
可憐顛顛田家女
促織聲中對曉燈

雪谷曉行圖

漫漫長路幾時休
風雪無情夢亦愁
羨殺田家老翁媪
瓦盆濁酒火鑪頭

與西僧倫伯達

行雲孤鶴萬緣輕
遙見鄉關眼便明
不似遺山元老子
塵埃風雨過平生



金
詩
卷
六
十
六

